

গঠনতন্ত্র

স্মারকলিপি, ধারা ও উপধারা সমূহ



বাংলাদেশ মেডিক্যাল এসোসিয়েশন

বিএমএ ভবন

১৫/২ তোপখানা রোড, ঢাকা-১০০০

বাংলাদেশ মেডিক্যাল এসোসিয়েশনের গঠনতন্ত্র

প্রথম খন্ড

মুখবন্ধ

যেহেতু তৎকালীন পাকিস্তানের চিকিৎসকেরা ১৯৫৬ সালে “পাকিস্তান মেডিক্যাল এসোসিয়েশন” নামে একটি সংগঠন করেন;

যেহেতু পূর্ব পাকিস্তানের চিকিৎসকেরা ঐ সংগঠনের আওতায় “পাকিস্তান মেডিক্যাল এসোসিয়েশন (পূর্বাঞ্চল)” নামে আঞ্চলিক ভিত্তিক নিজেদেরকে সংগঠিত করেন; যেহেতু “পাকিস্তান মেডিক্যাল এসোসিয়েশন (পূর্বাঞ্চল)” ১৯৭১ সালে বাংলাদেশের মুক্তিযুদ্ধে অংশগ্রহণ করে এবং এই সংগঠনকে “বাংলাদেশ মেডিক্যাল এসোসিয়েশন” এ নামান্তরিত করেন।

যেহেতু ১৯৭৩ সালের ১৪ই জানুয়ারী এক সাধারণ সভায় “বাংলাদেশ মেডিক্যাল এসোসিয়েশন” এক নতুন গঠনতন্ত্রের খসড়া পেশ ও গ্রহণ করে।

যেহেতু ১৯৭৭ সালের ৯ই জানুয়ারী “বাংলাদেশ মেডিক্যাল এসোসিয়েশন” তার বার্ষিক সাধারণ সভায় গঠনতন্ত্রের আরও কিছু সংশোধন প্রয়োজন মনে করে। সেই হেতু এসোসিয়েশনের সাধারণ সভায় এই লক্ষ্যে একটি উপ-পরিষদ গঠন করে এবং ১৯৭৯ সালের ৩১শে মার্চ গঠনতন্ত্র উপ-পরিষদের সুপারিশ অনুযায়ী সংশোধিত গঠনতন্ত্র সাধারণ সভায় গ্রহণ করে।

যেহেতু ১৯৮৩ সালে আগষ্ট মাসে দশম জাতীয় সম্মেলনের সময় আনুষ্ঠানিক বার্ষিক সাধারণ সভা পুনরায় গঠনতন্ত্রের সংশোধন প্রয়োজন বোধ করে সর্বসম্মতক্রমে একটি গঠনতন্ত্র উপ-পরিষদ গঠন করে। এবং এই গঠনতন্ত্র উপ-পরিষদ দীর্ঘ বিবেচনার পর তাঁর সুপারিশাদি সর্বসম্মতভাবে স্থির করেন।

যেহেতু ১০ই মে ১৯৮৫ বাংলাদেশ মেডিক্যাল এসোসিয়েশনের একাদশ জাতীয় সম্মেলন উপলক্ষ্যে আনুষ্ঠানিক বার্ষিক সাধারণ পরিষদের সভায় গঠনতন্ত্র উপ-পরিষদের সংশোধনী, মূল গঠনতন্ত্রের বঙ্গানুবাদ, যথাসময়ে সদস্যদের কর্তৃক প্রদত্ত সংশোধনী সমূহ বিবেচনা করিয়া সর্বসম্মতভাবে এই গঠনতন্ত্র অনুমোদন ও ১০ই মে ১৯৮৫ সাল থেকে কার্যকর বলে ঘোষণা করিতেছে। বাংলা ভাষায় গৃহীত এই মূল গঠনতন্ত্রের একটি স্বীকৃত ইংরেজী অনুবাদও সাথে সাথে গৃহীত হইল।

যেহেতু কেন্দ্রীয় কার্যকরী পরিষদ গঠনতন্ত্র সংশোধনের প্রয়োজনে একটি উপ-পরিষদ গঠন করে সেই হেতু ২৮শে ফেব্রুয়ারী ১৯৯৭ বাংলাদেশ মেডিক্যাল এসোসিয়েশনের চতুর্দশ জাতীয় সম্মেলন উপলক্ষ্যে আনুষ্ঠানিক বার্ষিক সাধারণ সভায় কেন্দ্রীয় কাউন্সিল কর্তৃক অনুমোদিত উপ-পরিষদের প্রস্তাবিত গঠনতন্ত্রের সংশোধনী গৃহীত হইল।

যেহেতু বর্তমান কেন্দ্রীয় কার্যকরী পরিষদ গঠনতন্ত্র সংশোধনের প্রয়োজনে একটি উপ-পরিষদ গঠন করে সেই হেতু ২২শে অক্টোবর ২০০৪ বাংলাদেশ মেডিক্যাল এসোসিয়েশনের ১৭তম জাতীয় সম্মেলন উপলক্ষ্যে অনুষ্ঠিত বার্ষিক সাধারণ সভায় কেন্দ্রীয় কাউন্সিল কর্তৃক অনুমোদিত উপ-পরিষদের প্রস্তাবিত গঠনতন্ত্রের সংশোধনী গৃহীত হইল।

বাংলাদেশ মেডিক্যাল এসোসিয়েশনের গঠনতন্ত্র

প্রথম খন্ড স্মারক লিপি

১. নাম :

এই সংগঠনের নাম হইবে “বাংলাদেশ মেডিক্যাল এসোসিয়েশন” সংক্ষেপে বি,এম,এ,।

২. রেজিষ্টার্ড কার্যালয় :

এসোসিয়েশনের রেজিষ্টার্ড কার্যালয় ঢাকায় অবস্থিত থাকিবে।

৩. ভাষা:

নথিপত্রের ভাষা হইবে বাংলা। তবে প্রয়োজনে ইংরেজী ব্যবহার করা যাইবে।

৪. প্রতীক :

১৯৭৫ সালের ২১ শে জুনের সাধারণ সভায় গৃহীত সাথে প্রদর্শিত “একটি লাঠিকে জড়াইয়া রহিয়াছে একটি সাপ” এই প্রতীকটি এসোসিয়েশনের প্রতীক হিসাবে ব্যবহৃত হইবে।

৫. উদ্দেশ্য ও লক্ষ্য :

যে সকল লক্ষ্য ও উদ্দেশ্যের জন্য এই এসোসিয়েশন প্রতিষ্ঠিত হইয়াছে তাহা হইলঃ-

- ৫.১ চিকিৎসা বিজ্ঞান ও ইহার সহযোগী বিজ্ঞান সমূহের উৎকর্ষ সাধন করা।
- ৫.২ চিকিৎসা পেশার সম্মান ও মর্যাদা রক্ষা করা, এবং এসোসিয়েশনের সদস্যদের স্বার্থ, অধিকার ও সুযোগ সুবিধা রক্ষা করা, এবং জাতীয় ও ব্যক্তিগীবনে পেশাগত, নৈতিক, সামাজিক ও পেশাগত কারণে রাজনৈতিক দায়িত্ব পালনে সদস্যবৃন্দকে উদ্বুদ্ধ করা।
- ৫.৩ স্বাস্থ্য সংক্রান্ত শিক্ষা প্রচারের মাধ্যমে বাংলাদেশের মানুষের দৈহিক ও মানসিক স্বাস্থ্য রক্ষার্থে এই পেশাকে সহায়তা প্রদান করা।
- ৫.৪ বাংলাদেশে চিকিৎসা শাস্ত্র শিক্ষা ও তৎসংক্রান্ত গবেষণার উন্নয়নকল্পে পদক্ষেপ গ্রহণ করা।
- ৫.৫ এসোসিয়েশনের সদস্যদের মধ্যে সহযোগিতা ও সংহতি রক্ষা করা এবং ভ্রাতৃসুলভ সম্পর্ক স্থাপন করা। অন্যান্য বিজ্ঞান ও প্রযুক্তিগত সংগঠন ও প্রতিষ্ঠানাদির সদস্যবৃন্দের সংগেও সহযোগিতা এবং সংহতি বজায় রাখা এবং পেশা ও জনগনের মধ্যে বৈজ্ঞানিক দৃষ্টিভঙ্গি গড়িয়া তোলার জন্য এ সকল সংগঠনের সহিত প্রয়োজন বোধে মৈত্রী গড়িয়া তোলা।
- ৫.৬ চিকিৎসক ও যে জনগণকে তারা সেবা করেন তাহাদের মধ্যে সমঝোতা আরও বৃদ্ধি করা এবং সম্পর্ক ঘনিষ্ঠতর করা।
- ৫.৭ সরকার ও অন্যান্য সংগঠিত সংস্থা কর্তৃক পরিচালিত স্বাস্থ্য ও চিকিৎসা বিজ্ঞান শিক্ষা ইত্যাদি সংক্রান্ত ক্ষেত্রগুলি পরিচালনায় ও রক্ষণাবেক্ষণে চিকিৎসকদের পেশাগত ও বিশেষজ্ঞ সাহায্য, উপদেশ ও সহযোগিতা প্রদান করা।

- ৫.৮ এই ধরনের লক্ষ্য ও উদ্দেশ্য দ্বারা পরিচালিত জাতীয় ও আন্তর্জাতিক সংস্থাগুলিকে সাহায্য ও সহযোগিতা প্রদান ও সংশ্লিষ্ট হওয়া।
- ৫.৯ এই পেশার ব্যক্তিবর্গ বিশেষ করিয়া নতুন যাহার এই পেশায় প্রবেশ করিয়াছেন, তাহাদের পেশাগত উন্নয়নে পরামর্শ ও সাহায্য প্রদান করা।
- ৫.১০ পেশার পঙ্গু ব্যক্তিবর্গ ও মৃত ব্যক্তিদের পরিবারের সদস্যদের সাহায্য প্রদান করা।
- ৫.১১ চিকিৎসা সেবা যথাযথভাবে প্রদানের মাধ্যমে প্রকৃত অর্থে জনসেবা নিশ্চিত করার লক্ষ্যে সদস্যদের ইথিক্যাল প্র্যাকটিসের ব্যাপারে উদ্বুদ্ধ করা এবং চিকিৎসকদের প্রয়োজনে আইনী সহায়তা দেওয়া।
- ৫.১২ জনগনের স্বাস্থ্য ব্যবস্থার উন্নয়নে এসোসিয়েশন সর্বাঙ্গিকভাবে কাজ করবে এবং প্রয়োজনে জনস্বার্থ বিরোধী যে কোন পরিস্থিতি প্রতিরোধ করতে নিয়মতান্ত্রিক কর্মপন্থা গ্রহণ করবে।

৬. আয় ও সম্পত্তি :

- ৬.১ বিধিবদ্ধ কোন সূত্র হইতে প্রাপ্ত সংগঠনের আয় ও সম্পত্তি স্মারকলিপিতে বর্ণিত এসোসিয়েশনের উদ্দেশ্য সমূহ বাস্তবায়নেই শুধুমাত্র ব্যয় করা যাইবে এবং কোন অবস্থাতেই ইহার কোন অংশ সরাসরি লভ্যাংশ বা বোনাস বা অন্য কোন ভাবে লাভ হিসাবে ইহার সদস্যদের কিংবা পূর্বে কখনও সদস্য ছিলেন তাহাদের কিংবা তাহাদের মাধ্যমে কোন ব্যক্তির মুনাফা হিসাবে প্রদান করা চলিবে না, তবে এসোসিয়েশনের কোন কর্মচারী বা কোন সদস্যকে সংগঠনের কোন কাজের জন্য ইহার বিনিময়ে সৎ উদ্দেশ্যে প্রদত্ত অর্থ ইহার আওতায় পড়িবে না।
- ৬.২ এসোসিয়েশনের বিলুপ্তি হওয়ার সময়ে প্রতিটি সদস্যই যখন তিনি সংগঠনের সদস্য থাকিবেন, তখন এসোসিয়েশনের কার্যোপলক্ষ্যে বিলুপ্তির দরুণ দেয় সকল ব্যয়ভার বহন করিতে অঙ্গীকারবদ্ধ।

৭ পদ্ধতি :

উপরে বর্ণিত লক্ষ্য সমূহ বাস্তবায়ন ও ইহাদের আরও বিকশিত করিবার লক্ষ্যে :

- ৭.১ প্রয়োজন বোধ করিলে খবরাদি প্রকাশের জন্য সাময়িকী, জার্নাল বা পত্রিকা যাহা সংগঠনের জার্নাল বা পত্রিকা হিসাবে পরিগণিত হইবে, তাহা নিয়মিত অথবা অনিয়মিত ভাবে প্রকাশ করা।
- ৭.২ চিকিৎসা বিজ্ঞান অথবা ইহার সহিত সম্পর্কিত অন্যান্য বিজ্ঞানের উপর মাঝে মাঝে বক্তৃতামালা, চিকিৎসা, বা প্রদর্শনীর ব্যবস্থা করা।
- ৭.৩ সাধারণ ভাবে চিকিৎসা পেশায় নিয়োজিত ব্যক্তিদের ও বিশেষ করিয়া এসোসিয়েশনের সদস্যদের সভা ও সম্মেলন অনুষ্ঠান করা।
- ৭.৪ চিকিৎসা বিজ্ঞান এবং ইহার সহিত সম্পর্কিত অন্যান্য বিজ্ঞানের গবেষণাকে উৎসাহিত করিবার লক্ষ্যে এসোসিয়েশন কর্তৃক সময় সময় নির্ধারিত পদ্ধতিতে বৃত্তি, পুরস্কার বা অনুদান প্রদান করা।
- ৭.৫ এসোসিয়েশনের সদস্যদের জন্য এসোসিয়েশনের কার্যালয়, পাঠকক্ষ, গ্রন্থাগার ও ক্লাবের রক্ষণাবেক্ষণ করা।
- ৭.৬ একই লক্ষ্য অর্জনে বিশ্বাসী অন্যান্য সংগঠন সমূহের সহিত সহযোগিতায় অথবা সাময়িকী, ম্যাগাজিন ও পুস্তিকা প্রকাশের মাধ্যমে বাংলাদেশের জনগণের মাঝে জনস্বাস্থ্য ও পয়ঃনিষ্কাশন সংক্রান্ত ব্যাপারে শিক্ষামূলক প্রচার অভিযান চালানো।

- ৭.৭ মহামারী কিংবা অন্য কোন জরুরী অবস্থায় সংগঠনের সদস্যদের দ্বারা গঠিত স্বেচ্ছাসেবক বাহিনী সংগঠিত করা।
- ৭.৮ চিকিৎসা বিজ্ঞানের শিক্ষা ও চিকিৎসা পেশা সম্পর্কে বাংলাদেশে প্রচলিত আইন কানুন সমূহ পর্যালোচনা করা ও এ সম্পর্কে মত প্রকাশ করা এবং জনস্বাস্থ্য, চিকিৎসা পেশা ও চিকিৎসা শাস্ত্র সম্পর্কিত আইন কানুনের প্রতি সজাগ দৃষ্টি রাখা এবং এ সম্পর্কে যে পদ্ধতি সবচেয়ে কার্যকর মনে হইবে সময় বিশেষে সেই পদ্ধতিতে পদক্ষেপ গ্রহণ করা।
- ৭.৯ চিকিৎসা, স্বাস্থ্য ও এ সম্পর্কিত অন্যান্য ক্ষেত্রের উন্নয়নে সংগঠন কর্তৃক সময় সময় নির্ধারিত পদ্ধতিতে এসোসিয়েশনের তহবিল হইতে অর্থ প্রদান করা।
- ৭.১০ এসোসিয়েশনের স্বার্থে প্রয়োজনীয় বা সুবিধাজনক যে কোন রকম স্থাবর ও অস্থাবর সম্পত্তি ক্রয় করা, ইজারা নেওয়া, ভাড়া করা বা দেওয়া, ব্যবস্থাপনা করা, বন্ধক দেওয়া ও ক্রয় বিক্রয় করা।
- ৭.১১ এসোসিয়েশনের জন্য দালান বা দালান সমূহ নির্মাণ, রক্ষণাবেক্ষণ, তাহাদের উন্নয়ন, পরিবর্তন ও সংস্কার করা।
- ৭.১২ এসোসিয়েশন যে পদ্ধতিকে উপযুক্ত মনে করে, সেই পদ্ধতিতে, ঋন গ্রহণ করা বা সংগ্রহ করা এবং এসোসিয়েশনের তহবিলের জন্য চাঁদা সংগ্রহ করা।
- ৭.১৩ এসোসিয়েশন দ্বারা মাঝে মাঝে নির্ধারিত করিয়া দেওয়া পদ্ধতি অনুযায়ী তাৎক্ষণিক পূরনীয় নয় এমন কোন লক্ষ্যে এসোসিয়েশনের যে কোন পরিমাণ অর্থ বিনিয়োগ করা।
- ৭.১৪ পরিপূর্ণ বা আংশিকভাবে সংগঠনের লক্ষ্য সমূহের সহিত সংগতি রহিয়াছে এমন রেজিস্ট্রিকৃত যে কোন সংগঠনকে অথবা ট্রাস্টকে সাহায্য প্রদান, অনুদান প্রদান, সহযোগিতা করা, সংশ্লিষ্ট হওয়া বা করা অথবা কোন তহবিল গঠন করা।
- ৭.১৫ উপরে বর্ণিত লক্ষ্য অনুযায়ী এসোসিয়েশনের শাখা সমূহ সংগঠিত করা।
- ৭.১৬ উপরে বর্ণিত লক্ষ্য সমূহ বা ইহার যে কোন একটি অর্জনের জন্য সকল প্রকার আইনানুগ কার্য পরিচালনা করা।

দ্বিতীয় খন্ড

এসোসিয়েশনের ধারাসমূহ

১. ব্যাখ্যা :

এসোসিয়েশনের এই ধারা সমূহে (যে ক্ষেত্রে তাহার বিষয় ও প্রাসংগিকতার প্রতিকূল নয়) নিম্নলিখিত শব্দ ও বক্তব্য বলিতে পার্শ্বে লিখিত অর্থ বুঝাইবে :

- ১.১ “এসোসিয়েশন” অর্থ বাংলাদেশ মেডিক্যাল এসোসিয়েশন।
- ১.২ “গঠনতন্ত্র” অর্থ বাংলাদেশ মেডিক্যাল এসোসিয়েশনের গঠনতন্ত্র।
- ১.৩ “স্মারকলিপি” অর্থ বাংলাদেশ মেডিক্যাল এসোসিয়েশনের গঠনতন্ত্রের স্মারকলিপি।
- ১.৪ “ধারা সমূহ” অর্থ বাংলাদেশ মেডিক্যাল এসোসিয়েশনের গঠনতন্ত্রের ধারাসমূহ।
- ১.৫ “উপধারা সমূহ” গঠনতন্ত্রের বিধান অনুযায়ী গৃহীত উপধারা সমূহ এবং গঠনতন্ত্র ধারাসমূহ সাপেক্ষে কার্যকর ও বৈধ।
- ১.৬ “নীতিমালা” অর্থ এসোসিয়েশনের স্মারকলিপি ও ধারা সমূহ অনুযায়ী এসোসিয়েশনের কেন্দ্রীয় কাউন্সিল কর্তৃক নির্ধারিত নীতিমালা।
- ১.৭ “বিধি” অর্থ উপধারা সমূহ অনুযায়ী এসোসিয়েশনের কেন্দ্রীয় কাউন্সিল কর্তৃক নির্ধারিত বিধি সমূহ।
- ১.৮ “অনুচ্ছেদ” অর্থ গঠনতন্ত্রের অনুচ্ছেদ।
- ১.৯ “কাউন্সিল” অর্থ এসোসিয়েশনের লক্ষ্য বা লক্ষ্য সমূহ পূরণে প্রয়োজনীয় কার্যাদি সম্পন্ন করিবার জন্য এসোসিয়েশনের গঠনতন্ত্র অনুযায়ী সৃষ্ট এসোসিয়েশনের কেন্দ্রীয় কাউন্সিল।
- ১.১০ “শাখা” অর্থ এসোসিয়েশনের স্থানীয় লক্ষ্য ও উদ্দেশ্য পালনে গঠনতন্ত্র অনুযায়ী গঠিত এসোসিয়েশনের স্থানীয় শাখা।
- ১.১১ “জার্নাল” অর্থ পরবর্তীতে লিপিবদ্ধ পদ্ধতি অনুযায়ী প্রকাশিত সংগঠনের পত্রিকা।
- ১.১২ “পত্রিকা” অর্থ পরবর্তীতে লিপিবদ্ধ পদ্ধতি অনুযায়ী প্রকাশিত সংগঠনের পত্রিকা।
- ১.১৩ “সদস্য” বলিতে বাংলাদেশ মেডিক্যাল এসোসিয়েশনের সাধারণ সদস্য ও আজীবন সদস্য বুঝাইবে।
- ১.১৪ “বর্ষ” বলিতে এসোসিয়েশনের ধারাসমূহে বর্ণিত ধারার অধীনে এসোসিয়েশনের বর্ষ বুঝাইবে।
- ১.১৫ “কেন্দ্রীয় কার্যকরী পরিষদ” অর্থ এসোসিয়েশনের কাউন্সিল কর্তৃক গৃহীত নীতিমালার ভিত্তিতে দৈনন্দিন কার্যাবলী সম্পন্ন করার জন্য গঠনতন্ত্র অনুযায়ী সৃষ্ট এসোসিয়েশনের কেন্দ্রীয় কার্যকরী পরিষদ।
- ১.১৬ “সাধারণ পরিষদ” অর্থ এসোসিয়েশনের সকল সদস্যদের সমবায়ে গঠিত এসোসিয়েশনের সর্বোচ্চ ক্ষমতাবান সংস্থা।

২. সদস্যদের নিবন্ধ পুস্তক :

এসোসিয়েশনের সকল সদস্যদের নাম, শিক্ষাগত যোগ্যতা ও ঠিকানা সম্বলিত একটি তালিকা নিবন্ধ পুস্তকে অথবা কম্পিউটারে সংরক্ষিত থাকিবে। নিবন্ধ পুস্তকের/কম্পিউটারের ক্রমিক নং সদস্য নম্বর হিসাবে গণ্য হইবে।

৩. শাখা সমূহ :

এসোসিয়েশনের লক্ষ্য সমূহ আরও কার্যকর ভাবে অর্জন করিবার জন্য এসোসিয়েশনের সকল সদস্য “শাখা” নামে পরিচিত স্থানীয় সংস্থায় নিজেদেরকে সংগঠিত করিবেন।

৩.১ এসোসিয়েশনের নীতিমালা, বিধি ও উপধারার অধীনে শাখা সমূহ তাহাদের শাখা ব্যবস্থাপনার ব্যাপারে স্বায়ত্বশাসিত থাকিবে। কেন্দ্রীয় কাউন্সিলের অনুমোদন সাপেক্ষে স্থানীয় অবস্থা অনুযায়ী তাহারা প্রয়োজনবোধে নিজেদের উপধারাসমূহ ও পরবর্তী নীতি ও বিধি প্রনয়ন করিতে পারিবে। তবে কেন্দ্রীয় কাউন্সিল অনুমোদন না করা পর্যন্ত ইহারা কার্যকরী হইবে না।

৩.২ বাংলাদেশ মেডিক্যাল এসোসিয়েশন তাহার কোন শাখার ঋণ বা দায়ের জন্য কেন্দ্র বা অন্য কোন শাখা দায়ী থাকিবে না।

৩.৩ ঢাকা মহানগরী শাখার কোন কার্যকরী পরিষদ থাকিবে না। ইহা সরাসরি কেন্দ্রের অধীনে থাকিবে।

৪. সদস্য পদের যোগ্যতা :

কোন স্বীকৃত মেডিক্যাল শিক্ষা প্রতিষ্ঠান বা বিশ্ববিদ্যালয় হইতে কোন ব্যক্তি, যিনি এল,এম,এফ সার্টিফিকেট বা এম,বি,বি,এস বা এম,বি বা এম,ডি বা এম,বি,সি,এইচ,বি ডিগ্রী যাহা বাংলাদেশ মেডিক্যাল ও ডেন্টাল কাউন্সিল কর্তৃক রেজিস্ট্রি হইবার উপযুক্ত সেই শিক্ষাগত যোগ্যতা অর্জন করেন, তিনি সদস্য পদের জন্য উপযুক্ত বলিয়া বিবেচিত হইবেন। কোন বাংলাদেশের নাগরিক, বর্তমানে বাংলাদেশ মেডিক্যাল ও ডেন্টাল কাউন্সিলের অধীনে রেজিস্ট্রিযোগ্য নয়, এমন কোন বিদেশী শিক্ষা প্রতিষ্ঠানের আধুনিক চিকিৎসা বিজ্ঞানে ডিগ্রী অর্জন করিলে, কেন্দ্রীয় কাউন্সিলের দ্বারা উক্ত ডিগ্রী অনুমোদন লাভ করিলে, তিনি সদস্য পদের জন্য উপযুক্ত বলিয়া বিবেচিত হইবেন। সদস্য হিসাবে অন্তর্ভুক্তি এসোসিয়েশনের নীতি ও বিধি সাপেক্ষ এবং সময় সময় গৃহীত উপধারা সমূহ দ্বারা নির্ধারিত পদ্ধতি অনুযায়ী পরিচালিত হইবে। কোন মেডিক্যাল ব্যক্তির সদস্য পদের যোগ্যতার প্রশ্নে কেন্দ্রীয় কাউন্সিলের সিদ্ধান্ত চূড়ান্ত বলিয়া গণ্য করা হইবে।

৫. সদস্য হইবার নিয়মাবলী ও শ্রেণী বিভাগ :

৫.১ সাধারণ সদস্য : উপরোক্ত ৪ নং ধারা অনুযায়ী শিক্ষাগত যোগ্যতা সম্পন্ন ব্যক্তিবর্গ তিনি যে স্থানে সাধারণ ভাবে বসবাস করেন, সে স্থানের বাংলাদেশ মেডিক্যাল এসোসিয়েশনের স্থানীয় শাখার সাধারণ সম্পাদকের এবং ঢাকা মহানগরীর ক্ষেত্রে বাংলাদেশ মেডিক্যাল এসোসিয়েশনের মহাসচিবের নিকট এসোসিয়েশনের সদস্য পদের জন্য নির্ধারিত ফর্মে প্রয়োজনীয় পরিষদ কর্তৃক যাচাই ও সম্মতি প্রাপ্ত হইলেই তিনি এসোসিয়েশনের সাধারণ সদস্য হিসাবে তালিকভুক্ত হইবেন। শাখা প্রয়োজনীয় রেকর্ড ও রেজিস্ট্রেশন বাবদ কেন্দ্রীয় তহবিলের জন্য তাহার চাঁদার অংশসহ নতুন সদস্যের আবেদন পত্রের একটি কপি কেন্দ্রীয় কার্যালয়ে পেশ করিবে। যে কোন সদস্য কেবল একটি শাখার সদস্য হইতে পারিবেন। সদস্য হওয়ার যোগ্য চিকিৎসক সেখানে বাস করেন বা কর্মরত আছেন সেই জেলার সদস্য হবেন। বদলীয় কারণে সদস্য অন্যত্র গমন করিলে তাহার আবেদনের প্রেক্ষিতে সেই শাখার সদস্য পদ শূন্য হইবে এবং আবেদনের মাধ্যমে নতুন শাখায় সদস্য পদ লাভ করিবেন।

৫.২ **সম্মানিত সদস্য :** চিকিৎসা বিজ্ঞান ও পেশাগত ক্ষেত্রে উচ্চতর উৎকর্ষ অর্জনকারী ব্যক্তিবর্গ অথবা যাহারা মানবতা ও বিজ্ঞানের ক্ষেত্রে গুরুত্বপূর্ণ অবদান রাখিয়াছেন অথবা এসোসিয়েশনের কার্যক্রমে উল্লেখযোগ্য অবদান রাখিয়াছেন, তাহাদের নিম্নলিখিতভাবে এসোসিয়েশনের সম্মানিত সদস্য হিসাবে নির্বাচিত করা যাইতে পারে।

সম্মানিত সদস্যদের নাম ও যোগ্যতা, তাহার সম্মতিসহ এসোসিয়েশনের অনূন্য ২৫ জন সদস্য অথবা কেন্দ্রীয় কাউন্সিলের ১০ জন সদস্যের দ্বারা প্রস্তাবিত হইতে হইবে। কেন্দ্রীয় কাউন্সিলের সভায় নির্বাচন অনুষ্ঠিত হইবে এবং সভায় উপস্থিত সদস্যের দুই তৃতীয়াংশ প্রস্তাবের পক্ষে ভোট প্রদান করিলে তিনি নির্বাচিত হইবেন।

৫.৩ **আজীবন সদস্য :** কোন সদস্য যিনি গঠনতন্ত্রের ৪ নং ধারা অনুযায়ী সদস্য পদের দরখাস্তের সাথে এককালীন তিন হাজার টাকা প্রদান করে আজীবন সদস্য পদে অন্তর্ভুক্তির জন্য আবেদন করিতে পারিবেন। এই বিধি ও পদ্ধতি সাধারণ সদস্যের অন্তর্ভুক্তির পদ্ধতির অনুরূপ হইবে।

৫.৪ **সহযোগী সদস্য :** চিকিৎসা বিজ্ঞানের সহিত সম্পর্কিত বিজ্ঞান সমূহ যথা কোন স্বীকৃত শিক্ষা প্রতিষ্ঠানের ডেন্টাল, নার্সিং, পশু চিকিৎসা, প্রাণরসায়ন, ভেষজ বিজ্ঞানের স্নাতক বা স্নাতকোত্তর ব্যক্তিবর্গ ও মেডিক্যাল প্রতিষ্ঠানের ক্লিনিক্যাল ছাত্ররা আবেদনকৃত শাখার নির্বাহী কমিটির অনুমোদনের প্রেক্ষিতে সহযোগী সদস্য হিসেবে নির্বাচিত হইতে পারিবেন। তাহারা পরবর্তীতে উল্লেখিত পরিমাণ বার্ষিক চাঁদা সহ এসোসিয়েশনের কোন শাখায় আবেদন করিলে, শাখার কার্যকরী পরিষদ কর্তৃক নির্বাচিত হইতে পারিবেন।

তাহারা ভোট প্রদান ও এসোসিয়েশনের কোন পদে অধিষ্ঠিত হওয়া ব্যতিরেকে সদস্য পদের অন্যান্য সকল সুযোগ সুবিধা লাভ করিবেন।

৫.৫ **সংশ্লিষ্ট সদস্য :** বাংলাদেশ মেডিক্যাল এসোসিয়েশনের সহিত সংশ্লিষ্ট (জাতীয় ও আন্তর্জাতিক) সংগঠন সমূহের সদস্যগণ সংশ্লিষ্ট সদস্য হিসাবে স্বীকৃত হইবেন এবং পরস্পর স্বীকৃত সুবিধাদি ভোগ করিবেন।

৫.৬ কোন সদস্য একাধিক শাখার সদস্য হইতে পারিবেন না।

৬. সদস্যদের দায়িত্ব ও অধিকার সমূহ :

৬.১ বাৎসরিক নিয়মিত চাঁদা প্রদান করিলে একজন সদস্য এসোসিয়েশনের সেই বৎসরের প্রকাশিত জার্নাল ও পত্রিকা এবং এসোসিয়েশনের সদস্যপদের সকল সুযোগ সুবিধাদি ভোগ করিবেন।

৬.২ প্রতিটি সদস্যকে বিনামূল্যে অথবা কেন্দ্রীয় কাউন্সিল দ্বারা নির্ধারিত মূল্যে এসোসিয়েশনের প্রকাশনা সমূহ সরবরাহ করিতে হইবে।

৬.৩ প্রতিটি সদস্যের এসোসিয়েশনের পাঠকক্ষ ও লাইব্রেরী ব্যবহার করিবার অধিকার থাকিবে।

৬.৪ প্রতিটি সদস্যের, তিনি যে শাখার সদস্য, সেই শাখা কর্তৃক নির্ধারিত উপধারা অনুযায়ী স্বীকৃত ও আয়োজিত সকল সাধারণ ও ক্লিনিক্যাল সভা, বক্তৃতামালা ও প্রদর্শনীতে অংশগ্রহণ করিবার অধিকার থাকিবে।

৬.৫ সহযোগী সদস্য ও সম্মানিত সদস্য ব্যতিরেকে প্রতিটি সদস্যের উপধারা সমূহে বর্ণিত উপায়ে, উপস্থিত থাকিলে, এসোসিয়েশনের সাধারণ পরিষদের যে কোন সভায় পেশকৃত সকল প্রস্তাবের উপর ভোট প্রদানের অধিকার থাকিবে।

৬.৬ প্রতিটি সদস্যের উপধারা সমূহে বর্ণিত বিধি কিংবা কেন্দ্রীয় কাউন্সিল কর্তৃক প্রদত্ত বিজ্ঞপ্তি পদ্ধতি অনুযায়ী এসোসিয়েশন কর্তৃক আয়োজিত চিকিৎসা সম্মেলন, কনভেনশন, ও সেমিনার সমূহে যোগদান করিবার অধিকার থাকিবে।

- ৬.৭ যদি তিনি অন্য সকল ভাবে কোন পদ/কাজের জন্য উপযুক্ত হন এবং তাহার চলতি নির্ধারিত বছরের সদস্য পদে চাঁদা দেওয়া থাকে, তাহা হইলে সকল সাধারণ সদস্য ও আজীবন সদস্য এসোসিয়েশনের পদের জন্য সকল নির্বাচনে ভোট প্রদান ও প্রার্থী হইবার অধিকারী হইবেন।
- ৬.৮ এসোসিয়েশনের সদস্য যে কোন ট্রাস্টের অথবা অনুরূপ যে কোন প্রতিষ্ঠানের সদস্য হওয়ার অধিকার রাখিবেন (ট্রাস্ট অথবা অনুরূপ প্রতিষ্ঠানের নিয়ম অনুযায়ী)।
- ৬.৯ প্রত্যেক আজীবন সদস্য ও সাধারণ সদস্য পরিচয় পত্র সংগ্রহের অধিকার রাখিবেন। (যাহা ভোটাধিকারের সময় প্রযোজ্য হইবে)।

৭. সদস্য পদের মেয়াদ :

পরবর্তীতে বর্ণিত বিধি অনুযায়ী, সদস্য পদ বাতিল না হওয়া পর্যন্ত একজন সদস্যের সদস্য পদ বহাল থাকবে।

৮. সদস্যপদ বাতিলকরণ :

নিম্নলিখিত পদ্ধতিতে সদস্য পদ বাতিল করা যাইতে পারে :

- ৮.১ পদত্যাগ কিংবা উপধারা কর্তৃক বিধিবদ্ধ পদ্ধতিতে নোটিশ প্রদান (পরবর্তী ধারার বিধান সাপেক্ষে)।
- ৮.২ স্বতঃস্ফূর্তভাবে উপধারায় বর্ণিত পূর্বে উল্লেখিত এসোসিয়েশনের চাঁদা প্রদানের ব্যর্থতার দ্বারা।
- ৮.৩ সদস্যপদ বাতিল করণ (পরবর্তী ধারায় বর্ণিত পদ্ধতি অনুযায়ী তদন্তের পর) কোন সদস্যের আচরণ চিকিৎসা পেশা বা এসোসিয়েশনের মর্যাদা ও স্বার্থের প্রতি হানিকর অথবা পেশার প্রতি অবমাননাকর বিবেচিত হইলে কিংবা কোন সদস্য ইচ্ছাকৃত ও ক্রমাগতভাবে এসোসিয়েশনের বিধানসমূহ মান্য করিতে অস্বীকার করিলে কেন্দ্রীয় কাউন্সিলের নিকট আপিল করিবার অধিকার সংরক্ষণ করিয়া তাহার সদস্য পদ বাতিল করা যাইতে পারে।
- ৮.৪ একাধিক শাখার সদস্য হইলে তাহার সকল শাখার সদস্য পদ বাতিল বলিয়া গণ্য হইবে।

৯. অবাঞ্ছিত আচরনের জন্য অপসারণ (তদন্তের পদ্ধতি) :

- ৯.১ কেন্দ্রীয় কাউন্সিল কিংবা কেন্দ্রীয় কাউন্সিল কর্তৃক প্রদত্ত ক্ষমতা সম্পন্ন কমিটি কর্তৃক যথাযথ তদন্তে কোন সদস্যের আচরণ উপরোক্ত ৮.৩ ধারায় তাহার সদস্য পদ বাতিলের উপযুক্ত বিবেচনা করিলে কেন্দ্রীয় কাউন্সিল কর্তৃক যে কোন সদস্যের এসোসিয়েশনের সদস্যপদ বাতিলের অধিকার রহিয়াছে। তদন্তের সময় পরবর্তীতে সনিবিষ্ট পদ্ধতিতে অন্ততঃপক্ষে ১৪ দিনের নোটিশ প্রদান করিয়া অভিযুক্ত সদস্যকে পত্র মারফত বা উপস্থিত হইয়া আত্মপক্ষ সমর্থনের জন্য নির্দিষ্ট সময় ও তারিখ জানাইতে হইবে। যে সদস্যকে বহিস্কার করা হইবে, সংশ্লিষ্ট শাখা তাহার সম্বন্ধে সকল তথ্য পরিবেশন করিবে।
- ৯.২ এই ধারার ৯.১ উপধারা প্রয়োগের জন্য কেন্দ্রীয় কাউন্সিলে প্রস্তাবের পক্ষে উপস্থিত সদস্যদের দুই তৃতীয়াংশ ভোটের প্রয়োজন হইবে।
- ৯.৩ বহিস্কৃত সদস্য, তার বহিস্কারের সময় তিনি যে শাখার সদস্য ছিলেন সেই শাখার প্রাপ্য সকল পাওনা পরিশোধ করিতে বাধ্য থাকিবেন।
- ৯.৪ কোন সদস্য যাহার আচরণ কেন্দ্রীয় কাউন্সিল, শাখা কার্যকরী পরিষদ অথবা কেন্দ্রীয় কাউন্সিল অথবা শাখা কর্তৃক প্রদত্ত ক্ষমতা বলে কোন কমিটির নিকট তদন্তাধীন রহিয়াছে তিনি যতক্ষণ পর্যন্ত না এই তদন্ত হইতেছে এবং সিদ্ধান্ত ঘোষিত হইতেছে, ততদিন পর্যন্ত পদত্যাগ করিতে পারিবেন না।

১০. পুনরায় সদস্য পদ লাভের যোগ্যতা :

পদত্যাগের কারণে বা চাঁদা না প্রদান করার জন্য কোন সদস্যের সদস্যপদ রহিত হইলে তাহার সদস্যপদ রহিতের তারিখ হইতে প্রাপ্য পাওনা পরিশোধ সহ নতুন আবেদনপত্রের ভিত্তিতে তাহাকে পুনরায় সদস্য হিসাবে অন্তর্ভুক্ত করা যাইবে। তবে, সংশ্লিষ্ট শাখার সুপারিশক্রমে কেন্দ্রীয় কাউন্সিল সেই সদস্যদের নিকট হইতে প্রাপ্য পাওনা সম্পূর্ণ বা অংশ বিশেষ মওকুফ করিতে পারে। ৮.৩ ধারা অনুযায়ী কোন সদস্যের সদস্যপদ বাতিল ঘোষিত হইলে, সদস্যপদ বাতিলের দুই বৎসর বা অধিককাল অতিক্রান্ত হইবার পর সত্যায়ন করিয়া ১০ জন এসোসিয়েশনের সদস্যের সমর্থন সহ পুনরায় সদস্যপদের জন্য দরখাস্ত প্রদান করিলে তাহাকে পুনরায় সদস্য হিসাবে অন্তর্ভুক্ত করা যাইবে। অথবা এই ধারার অধীনে যে সদস্য পদত্যাগ করিয়াছেন তিনি লিখিত ভাবে ক্ষমা প্রার্থনা ও শাখার সুপারিশসহ আবেদন করিলে কেন্দ্রীয় কাউন্সিলের নিকট গ্রহণযোগ্য হইলে দুই বৎসরের পূর্বে তাহাকে পুনরায় সদস্যপদ প্রদান করা যাইতে পারে।

১১. চাঁদা :

১১.১ উপধারা অনুযায়ী প্রতিটি সদস্য উপধারায় সেই সময়ের জন্য নির্ধারিত অর্থের চাঁদা এসোসিয়েশনের নিকট প্রদান করিবে। এই চাঁদা প্রতি বৎসর সদস্যপদ নবায়নের জন্য প্রদান করিতে হইবে তবে একসাথে একাধিক বৎসরেরও চাঁদা পরিশোধ করা যাইবে। এই চাঁদা প্রতি বৎসর ১লা জানুয়ারীর পূর্বে অগ্রিম হিসাবে অথবা নতুন সদস্যের জন্য তাহার সদস্যভুক্তির সময় প্রদান করিতে হইবে।

১১.২ প্রতিটি শাখা, উপধারা মোতাবেক প্রতিটি সদস্যের জন্য কেন্দ্রীয় তহবিলের অংশ প্রদান করিবে।

১২. এসোসিয়েশন বর্ষ :

আর্থিক ব্যাপারে এসোসিয়েশন ও তার বিভাগ সমূহের বর্ষকাল ১লা জানুয়ারী হইতে ৩১শে ডিসেম্বর পর্যন্ত গণনা করা হইবে।

১৩. এসোসিয়েশনের ব্যবস্থাপনা :

১৩.১ সাধারণ পরিষদ : এসোসিয়েশনের সর্বোচ্চ সংস্থা সাধারণ পরিষদের উপর এসোসিয়েশনের নীতি সমূহ নির্ধারণের দায়িত্ব থাকিবে। ইহা এসোসিয়েশনের সদস্যদের সমবায় গঠিত হইবে। ইহা কেন্দ্রীয় কাউন্সিল কর্তৃক নির্ধারিত তারিখ, সময় ও স্থানে সাধারণভাবে বৎসরে একবার অনুষ্ঠিত হইবে। সময় সময় প্রয়োজন বোধে, সভাপতি বা কেন্দ্রীয় কাউন্সিলের সুপারিশক্রমে উপধারা নির্ধারিত পদ্ধতিতে গণভোটের মাধ্যমে সাধারণ পরিষদের মতামত গ্রহণ করা যাইতে পারে।

১৩.২ কেন্দ্রীয় কাউন্সিল : কেন্দ্রীয় কাউন্সিল এসোসিয়েশনের স্মারকলিপি ও ধারা, উপধারা সমূহ অনুযায়ী এসোসিয়েশনের সাধারণ কার্যক্রম নিয়ন্ত্রণ ও পরিচালনা করিবেন। সাধারণ পরিষদের গৃহীত প্রস্তাবসমূহ বাস্তবায়ন করা কেন্দ্রীয় কাউন্সিলের দায়িত্ব। ইহা সাধারণভাবে প্রতি তিন মাস অন্তর বৈঠকে বসিবে। নিম্ন বর্ণিতভাবে গঠিত কেন্দ্রীয় কাউন্সিলের উপর এসোসিয়েশনের নিয়ন্ত্রণ ও ব্যবস্থাপনা বর্তাইবে।

১৩.২.১ এসোসিয়েশনের কর্মকর্তাবৃন্দ :

সভাপতি : একজন

সহ-সভাপতি : ঢাকা মহানগরীর জন্য একজন এবং বাংলাদেশের প্রতিটি প্রশাসনিক বিভাগের জন্য একজন করিয়া।

মহাসচিব : একজন, ঢাকা মহানগরীতে বসবাসকারী।

কোষাধ্যক্ষ : একজন, ঢাকা মহানগরীতে বসবাসকারী।

যুগ্ম মহাসচিব : একজন।

সাংগঠনিক সম্পাদক : একজন।

বিভাগীয় সম্পাদক : ৭ (সাত) জন।

১. বিজ্ঞান বিষয়ক সম্পাদক	১জন
২. দপ্তর সম্পাদক	১জন
৩. প্রচার ও জনসংযোগ সম্পাদক	১জন
৪. সমাজ কল্যাণ সম্পাদক	১জন
৫. সংস্কৃতি ও আপ্যায়ন বিষয়ক সম্পাদক	১জন
৬. গ্রন্থাগার ও প্রকাশনা সম্পাদক	১জন
৭. আন্তর্জাতিক বিষয়ক সম্পাদক	১জন

১৩.২.২ কেন্দ্রীয় কার্যকরী পরিষদের সদস্যবৃন্দ।

১৩.২.৩ প্রতিটি শাখা হইতে কেন্দ্রীয় কাউন্সিলের সদস্য (শাখায় ১০০ জন বা অংশ বিশেষের জন্য একজন কেন্দ্রীয় কাউন্সিল সদস্য। শাখা কমিটির সভাপতি ও সাধারণ সম্পাদক পদাধিকারবলে কেন্দ্রীয় কাউন্সিলের সদস্য হইবেন।)

শাখা হইতে কেন্দ্রীয় কাউন্সিলের সদস্য সংখ্যা নির্ধারণের সময় কেন্দ্রীয় কাউন্সিল কর্তৃক নির্ধারিত তারিখ ও সময়ের মধ্যে যে সকল সদস্যের চাঁদার কেন্দ্রীয় তহবিলের নির্ধারিত অংশ প্রদান করা হইয়াছে, সদস্য সংখ্যা রেজিস্ট্রার রক্ষিত তাহাদের সংখ্যার ভিত্তিতে নির্ণয় করা হইবে।

১৪. কেন্দ্রীয় কার্যকরী পরিষদ :

সংগঠনের দৈনন্দিন কার্যক্রম পরিচালনার জন্য প্রতি দুই বৎসর অন্তর অন্তর কেন্দ্রীয় কার্যকরী পরিষদ নির্বাচন হইবে।

১৩.২.১ ও ১৩.২.২ ধারা অনুযায়ী কেন্দ্রীয় কার্যকরী পরিষদ নিম্নবর্ণিত ব্যক্তিবর্গ দ্বারা গঠিত হইবে।

১৪.১ এসোসিয়েশনের কর্মকর্তা :

সভাপতি : একজন

সহ-সভাপতি : ঢাকা মহানগরীর জন্য একজন এবং বাংলাদেশের প্রতিটি প্রশাসনিক বিভাগের জন্য একজন করিয়া।

মহাসচিব : একজন, ঢাকা মহানগরীতে বসবাসকারী।

কোষাধ্যক্ষ : একজন, ঢাকা মহানগরীতে বসবাসকারী।

যুগ্ম মহাসচিব : একজন।

সাংগঠনিক সম্পাদক : একজন।

বিভাগীয় সম্পাদক : ৭ (সাত) জন।

১. বিজ্ঞান বিষয়ক সম্পাদক	১জন
২. দপ্তর সম্পাদক	১জন
৩. প্রচার ও জনসংযোগ সম্পাদক	১জন
৪. সমাজ কল্যাণ সম্পাদক	১জন
৫. সংস্কৃতি ও আপ্যায়ন বিষয়ক সম্পাদক	১জন
৬. গ্রন্থাগার ও প্রকাশনা সম্পাদক	১জন
৭. আন্তর্জাতিক বিষয়ক সম্পাদক	১জন

১৪.২ কেন্দ্রীয় কার্যকরী পরিষদের সদস্য (নির্বাচিত) : ২১ জন।

১৪.৩ পদাধিকার বলে কেন্দ্রীয় কার্যকরী পরিষদের সদস্য :

১৪.৩.১ অব্যবহিত সাবেক সভাপতি

১৪.৩.২ অব্যবহিত সাবেক মহাসচিব

১৪.৩.৩ জার্নালের সম্পাদক মন্ডলীর সভাপতি।

১৪.৪ কেন্দ্রীয় কার্যকরী পরিষদের প্রথম সভায় কেন্দ্রীয় পরিষদের কো-অপ্টেড সদস্যগণ নির্বাচিত হইবেন। কেন্দ্রীয় কার্যকরী পরিষদের কো-অপ্টেড সদস্য সংখ্যা হইবে ছয়জন এবং অব্যবহিত সাবেক সভাপতি এবং মহাসচিব পুনরায় নির্বাচিত হইলে তাহাদের স্থলে আরও দুইজন।

১৫. নোটিশ :

১৫.১ এসোসিয়েশন কর্তৃক কোন সদস্যের নিকট কোন বিজ্ঞপ্তি ব্যক্তিগত ভাবে অথবা সদস্যপদ রেজিস্ট্রারে উল্লেখিত তাহার সর্বশেষ ঠিকানায় পূর্ব মূল্য পদন্ত চিঠি ডাকযোগে প্রদান করিয়া কিংবা সেই বিজ্ঞপ্তি জার্নাল অথবা খবরের কাগজে প্রকাশ এবং উক্ত বিজ্ঞপ্তি মুদ্রিত জার্নাল বা খবরের কাগজের কপি উল্লেখিত ঠিকানায় পূর্ব মূল্য প্রদান করিয়া চিঠি হিসাবে ডাকযোগে প্রেরণ করিয়া নোটিশ প্রদান করা যাইবে।

১৫.২ এসোসিয়েশন কর্তৃক কোন শাখার সভাপতি বা সাধারণ সম্পাদকের নিকট উপরোক্ত বিজ্ঞপ্তি প্রদান করা যাইবে।

১৫.৩ কোন নোটিশ বা নোটিশ মুদ্রিত জার্নাল/খবরের কাগজের কপি ডাকযোগে প্রেরণ করিলে তাহা যথাযথভাবে প্রদত্ত হইয়াছে বলিয়া বিবেচিত হইবে এবং এই কাজ করিলে চিঠি কিংবা নোটিশ মুদ্রিত জার্নাল/খবরের কাগজের কপি যথাযথভাবে ঠিকানায় প্রেরিত ও পোষ্ট অফিসে প্রদান করা হইয়াছে বলিয়া গণ্য হইবে।

১৬. কার্য বিবরণীর বৈধতা :

১৬.১ সাধারণ অধিবেশন, কেন্দ্রীয় কাউন্সিল বা বিধি ও উপধারার অধীনে গঠিত উপ-পরিষদ বা সংস্থার কিংবা শাখার কার্যবিবরণীতে অসাবধানতাবশতঃ ভ্রান্তির ফলে ইহা অবৈধ হইয়া শূন্যতা বা সদস্যদের শূন্য পদ কিংবা সদস্যদের যোগ্যতা বা নির্বাচনে ত্রুটি ঘটিবে না।

১৬.২ কেন্দ্রীয় কাউন্সিল বা কেন্দ্রীয় কার্যকরী পরিষদ কর্তৃক সেই কাজে নিযুক্ত হইলে এসোসিয়েশনের প্রয়োজনে ধারা, বিধি বা উপধারার অধীনে কোন কর্মকর্তা এবং সদস্য বা সদস্যগণ সেই কাজ করিতে পারিবেন।

১৭. বাংলাদেশ মেডিক্যাল সম্মেলন :

এসোসিয়েশনের আয়োজনে প্রতি বছর অথবা কেন্দ্রীয় কাউন্সিলের সিদ্ধান্ত অনুযায়ী বাংলাদেশ মেডিক্যাল সম্মেলন সংগঠিত হইবে। এসোসিয়েশনের কেন্দ্রীয় কাউন্সিল সম্মেলনের স্থান ও সময় স্থির করিবে।

১৮. আনুষ্ঠানিকভাবে সংশ্লিষ্ট :

১৮.১ সংগঠনের লক্ষ্য সমূহ অগ্রসর করিবার স্বার্থে বাংলাদেশের ভিতরে কিংবা বাহিরে প্রতিষ্ঠিত আঞ্চলিক, জাতীয় বা আন্তর্জাতিক এসোসিয়েশন, সোসাইটি অথবা বৈজ্ঞানিক সংগঠন সমূহের সহিত পারস্পরিক ভাবে সম্মত শর্তে কেন্দ্রীয় কাউন্সিল কর্তৃক গৃহীত প্রস্তাবের ভিত্তিতে আনুষ্ঠানিকভাবে সংশ্লিষ্ট হইবার বা করিবার অধিকার থাকিবে।

১৮.২ সংশ্লিষ্ট সংগঠন সমূহের সদস্যবৃন্দ পরস্পরে সম্মত সুযোগ সুবিধাদি ভোগ করিবেন।

১৮.৩ কেন্দ্রীয় কাউন্সিলের প্রস্তাবের ভিত্তিতে উভয় পক্ষকে যথাযথ নোটিশ প্রদানের পর এই ধরনের সংশ্লিষ্ট হইবার সিদ্ধান্ত বাতিল করা যাইবে।

১৯. স্মারকলিপি, ধারা উপ-ধারা সংশোধন, পরিবর্তন ও বাতিল করা :

১৯.১ সংগঠনের স্মারকলিপি, ধারা উপধারা সমূহ পরিবর্তনের প্রস্তাব সাধারণ পরিষদের বাৎসরিক সাধারণ সভার অন্ততঃপক্ষে ২মাস পূর্বে পৌছাইতে হইবে। প্রস্তাবিত বার্ষিক সাধারণ সভার অন্ততঃপক্ষে ৬ সপ্তাহ পূর্বে এই সকল প্রস্তাব সকল শাখা ও কেন্দ্রীয় কাউন্সিলের সদস্যদের নিকট মতামতের জন্য সরবরাহ করিতে হইবে। এই সকল মতামত মহাসচিবের নিকট সাধারণ পরিষদের বার্ষিক সাধারণ সভার ৪ (চার) সপ্তাহ পূর্বে পৌছাইতেই হইবে।

এ প্রস্তাব ও সদস্যদের মতামত সাধারণ পরিষদের বার্ষিক সাধারণ সভার পূর্বে অনুষ্ঠিত কেন্দ্রীয় কাউন্সিলের বার্ষিক সভায় বিবেচিত হইবে।

কেন্দ্রীয় কাউন্সিল গঠনতন্ত্র সংশোধনের জন্য “মূল প্রস্তাব” ও সদস্যদের মতামত এবং প্রস্তাবের উপর কেন্দ্রীয় কাউন্সিলের মতামত সিদ্ধান্তের জন্য সাধারণ পরিষদে পেশ করিবে। সাধারণ পরিষদের সভায় উপস্থিত দুই তৃতীয়াংশ সদস্য যদি এই সকল সংশোধনীর পক্ষে ভোট প্রদান করেন তবে ইহারা গৃহীত বলিয়া গণ্য হইবে।

১৯.২ উপধারা সমূহের সংশোধনের প্রস্তাব সাধারণ ভাবে কেন্দ্রীয় কাউন্সিলের বার্ষিক সভায় বিবেচিত হইবে। প্রস্তাবিত সংশোধনী সঠিক শব্দাবলীসহ এই সভার অন্ততঃ তিন মাস পূর্বে কেন্দ্রীয় কার্যালয়ে পৌছাইতে হইবে। সভার দুই মাস পূর্বে এই সকল প্রস্তাব কেন্দ্রীয় কাউন্সিলের সদস্যদের নিকট প্রেরণ করিতে হইবে। সাধারণ পরিষদের অনুমোদন সাপেক্ষে কেন্দ্রীয় কাউন্সিলের সভায় উপস্থিত দুই-তৃতীয়াংশ সংখ্যা গরিষ্ঠ সদস্যদের দ্বারা গৃহীত হইলে এই প্রস্তাব অবিলম্বে কার্যকর হইবে।

২০. কেন্দ্র/শাখা সমূহে নির্বাচনী বিরোধ :

২০.১ এসোসিয়েশনের কেন্দ্রীয় কাউন্সিল সাধারণভাবে দুই বৎসর অন্তর সাধারণ ও আজীবন সদস্যদের প্রত্যক্ষ ও গোপন ভোটে নির্বাচিত হইবে। ইহা নির্বাচন কমিশন দ্বারা পরিচালিত হইবে।

২০.২ কেন্দ্রে নির্বাচন সংক্রান্ত বিরোধ উপস্থিত হইলে রায় দেওয়ার জন্য একটি নির্বাচন ট্রাইবুনাল গঠিত হইবে। ট্রাইবুনালে অন্তর্ভুক্ত থাকিবেন বাংলাদেশ মেডিক্যাল এসোসিয়েশনের সভাপতি, অব্যবহিত প্রাক্তন সভাপতি ও অব্যবহিত প্রাক্তন মহাসচিব। শাখা বা শাখা সমূহের নির্বাচন বিরোধে শাখার সভাপতি, শাখার অব্যবহিত প্রাক্তন সভাপতি এবং বাংলাদেশ মেডিক্যাল এসোসিয়েশনের মহাসচিব সমন্বয়ে নির্বাচনী ট্রাইবুনাল গঠিত হইবে। যে কোন নির্বাচন সংক্রান্ত অভিযোগ নির্বাচনের চূড়ান্ত ফলাফল প্রদানের এক মাসের মধ্যে আনয়ন করতে হইবে।

২০.৩ যদি ট্রাইবুনালের কোন সদস্য কোন ভাবে বিরোধের সাথে জড়িত থাকেন তবে, তিনি ট্রাইবুনালের সদস্য হইতে পারিবেন না। তাঁর স্থান কেন্দ্রীয় কাউন্সিলের একজন সদস্য দ্বারা পূরণ করা হইবে। যদি ট্রাইবুনালের সদস্যদের মধ্যে মতবিরোধ দেখা দেয় তবে, কেন্দ্রে নির্বাচন বিরোধের জন্য বাংলাদেশ মেডিক্যাল এসোসিয়েশনের সভাপতি এবং শাখা নির্বাচন বিরোধের জন্য শাখা সভাপতির সিদ্ধান্ত চূড়ান্ত বলিয়া গণ্য করা হইবে।

তৃতীয় খন্ড

এসোসিয়েশনের উপধারাসমূহ

১. চাঁদা :

- ১.১.১ সকল সাধারণ সদস্য প্রতি বৎসর ১০০ টাকা (একশত টাকা) মাত্র চাঁদা প্রদান করিবেন। এই চাঁদা প্রতি বৎসর ১লা জানুয়ারী অগ্রীম হিসাবে অথবা যে সকল ডাক্তার বৎসরের অন্য কোন সময় সদস্য হিসাবে অন্তর্ভুক্ত হইবেন তাহার সদস্য পদ অর্জনের সময় ইহা প্রদান করিবেন।
- ১.১.২ সহযোগী সদস্যগণ সাধারণ সদস্যদের জন্য প্রযোজ্য একই হারে চাঁদা প্রদান করিবেন।
- ১.১.৩ আজীবন সদস্যগণ বার্ষিক চাঁদার বিকল্পে এককালীন ৩০০০ টাকা (তিন হাজার টাকা) মাত্র চাঁদা প্রদান করিবেন।
- ১.১.৪ সম্মানিত সদস্যদের কোন চাঁদা প্রদান করিতে হইবে না।

১.২ চাঁদার অর্থের বন্টন :

প্রতিটি শাখা তাহাদের সাধারণ ও সহযোগী সদস্যদের বার্ষিক চাঁদার শতকরা ৫০ ভাগ কেন্দ্রীয় তহবিলে জমা দিবেন। প্রতিজন আজীবন সদস্যের জন্য শাখা নির্ধারিত চাঁদার এক চতুর্থাংশ কেন্দ্রীয় তহবিলে জমা দিবেন। কেন্দ্রীয় তহবিলে প্রদত্ত অংশের শতকরা ৫০ ভাগ বাংলাদেশ মেডিক্যাল জার্নাল তহবিলে প্রদান করা হইবে।

১.৩ চাঁদা ও ইহার বন্টন সম্পর্কে সাধারণ বিধি সমূহ :

- ১.৩.১ প্রতি বৎসর ১লা জানুয়ারী সকল চাঁদা ও তাহা হইতে প্রাপ্য অংশ অগ্রিম প্রদান করিতে হইবে।
- ১.৩.২ যদি কোন সদস্যের পক্ষে চাঁদা বা ইহার প্রাপ্য অংশ বাকি পড়ে তবে নিম্নপ্রদত্ত ২.২ বিধি অনুযায়ী ব্যবস্থা গ্রহণ করা যাইবে।
- ১.৩.৩ যদি কোন সদস্য স্থায়ী ভাবে কোন শাখা পরিত্যাগ করেন এবং অন্য কোন শাখায় স্থানান্তরিত করেন, তবে তিনি অবশ্যই পূর্ববর্তী শাখায় সকল পাওনা পরিশোধ করিবেন এবং চলতি বৎসরের সমাপ্তি পর্যন্ত পাওনা পরিশোধ করা হইয়াছে এমন সার্টিফিকেট প্রদান পূর্বক বাড়তি চাঁদা প্রদান না করিয়া নতুন শাখার সদস্য হইতে পারিবেন। তাহাকে অবশ্য ১লা জানুয়ারী হইতে নতুন শাখায় পরবর্তী বৎসরের জন্য চাঁদা প্রদান করিতে হইবে। তাহার শাখা বদলের ঘটনা স্বাভাবিক ভাবে সেই শাখা কর্তৃক কেন্দ্রে অবগত করিতে হইবে। যদি কোন সদস্য শাখা পরিবর্তন করিয়া এসোসিয়েশনের কোন শাখা নেই এমন স্থানে স্থানান্তরিত হন, তবে তিনি যে সময়কালের জন্য তার শাখা কর্তৃক তার সদস্যপদের জন্য কেন্দ্রীয় তহবিলে অংশ প্রদান করা হইয়াছে সেই সময়ের জন্য সদস্যপদের সকল সুযোগ সুবিধা লাভ করিবেন। এরপর তার সদস্যপদ বাংলাদেশ মেডিক্যাল এসোসিয়েশনের যে কোন শাখায় স্থানান্তরিত করা যাইতে পারে।

২. সদস্য পদ বাতিল, স্থগিত ও পুনরায় অন্তর্ভুক্তি :

- ২.১ পদত্যাগের মাধ্যমে- যে কোন সদস্য লিখিতভাবে শাখার সাধারণ সম্পাদকের নিকট ৩০দিনের নোটিশ প্রদান করিয়া লিখিত ভাবে পদত্যাগ করিতে পারে।

পদত্যাগকারী সদস্য তার কাছে প্রাপ্য সকল পাওনা পরিশোধ করিবেন এবং সংশ্লিষ্ট শাখার সাধারণ সম্পাদক তার কাছে প্রাপ্য লেন-দেনের হিসাবে দাখিল করিবেন। এই পাওনা পরিশোধের পর একটি ছাড়পত্র দেওয়া হইবে এবং তাহার পদত্যাগ পত্র কেন্দ্রের নিকট প্রয়োজনীয় ব্যবস্থাগ্রহণের জন্য পেশ করা হইবে।

২.২ অব্যক্তি আচরনের জন্য অপসারণ :

২.২.১ যদি কোন সদস্যের আচরণ সংগঠনের স্বার্থের পরিপন্থী হয় কিংবা তাহার আচরণ পেশার মর্যাদা পরিকল্পিতভাবে বিনষ্ট করে তবে শাখার কার্যনির্বাহী কমিটি সেই সদস্যকে তাহার আচরনের জন্য ১ মাসের মধ্যে লিখিত ব্যাখ্যা দাবী করিতে পারে। যদি তাহার ব্যাখ্যা সন্তোষজনক বিবেচিত না হয় তবে সেই সদস্যকে ক্ষমা প্রার্থনা করিতে কিংবা এসোসিয়েশন হইতে পদত্যাগ করিতে বলা হইবে। যদি সেই সদস্য সম্মত হন তবে তাহার ক্ষমা প্রার্থনা বা পদত্যাগ গৃহিত হইতে পারে। ভবিষ্যতে রেফারেন্স ও প্রয়োজনীয় ব্যবস্থার জন্য গোপনীয় নোটসহ বিস্তারিত ঘটনার বিবরণ কেন্দ্রীয় কার্যালয়ে প্রেরণ করিতে হইবে।

যদি উক্ত সদস্য ক্ষমা প্রার্থনা করিতে বা পদত্যাগ করিতে অসম্মতি জানান তবে এই বিষয়টি বিবেচনার জন্য শাখার সাধারণ সভা আহ্বান করা হইবে এবং সংশ্লিষ্ট সদস্যকে সভার ৭ দিনের নোটিশ প্রদান করা হইবে যাহাতে তিনি ইচ্ছা করিলে তাহার আচরণ ব্যাখ্যা করার সুযোগ পান।

যদি সভায় উপস্থিত দুই তৃতীয়াংশ সদস্য তাহার নাম সদস্য পদ হইতে অপসারণের পক্ষে ভোট প্রদান করেন, তবে এই প্রস্তাব অনুমোদনের জন্য কেন্দ্রীয় কাউন্সিলে প্রেরণ করা হইবে এবং এই অনুমোদন লাভের পর তাহার নাম শাখার সদস্য তালিকা হইতে অপসারিত হইবে। ইতিমধ্যে তিনি সদস্য পদের অধিকার ও সুবিধাদি গ্রহণ হইতে বাঞ্ছিত হইবেন।

২.২.২ কোন বিচারালয় কর্তৃক অপরাধ প্রমাণে শাস্তি প্রদানের ফলে নাম কাটা যাওয়া।

২.২.৩ নৈতিক অসচ্চরিত্রের জন্য কোন বিচারালয়ে দণ্ডদেশ লাভ করিলে।

২.২.৪ যে মেডিক্যাল রেজিস্ট্রেশনের ভিত্তিতে তিনি সদস্য পদের উপযুক্ত হইয়াছিলেন, তাহা বাতিল হইলে।

২.৩ নিম্নবর্ণিত উপায়ে চাঁদা প্রদানের ব্যর্থতার জন্য সদস্যদের সদস্য পদ সাময়িকভাবে স্থগিত করা।

যদি কোন সদস্যের চাঁদা দেয় তারিখের তিন মাসের মধ্যে প্রদান করা না হয়, তবে সদস্যকে তার এই ত্রুটির কথা জানাইতে হইবে। এই নোটিশ প্রদান করিয়া স্পষ্টভাবে জ্ঞাতার্থে আনিতে হইবে যে, তিনি যদি নোটিশ প্রাপ্তির ৭ দিনের মধ্যে চাঁদা পরিশোধ না করেন তবে তাহার সদস্য পদের সকল সুযোগ সুবিধা স্থগিত করা হইবে। কেন্দ্রীয় কার্যালয়ে এই সংক্রান্ত যথাযথ সংবাদ জানাইতে হইবে। যদি এর পরও তাহার পাওনা পরিশোধ করা না হয় তবে জার্নাল ও পত্রিকা সরবরাহসহ তাহার সদস্যপদের সকল সুযোগ সুবিধাদি স্থগিত করা হইবে এবং এই বিষয়টি প্রয়োজনীয় ব্যবস্থা বিবেচনার জন্য কেন্দ্রীয় কার্যালয়ে যথাযথ সংবাদ পাঠনো হইবে।

২.৪ পুনরায় অন্তর্ভুক্তি :

২.১ ও ২.২ বিধি অনুযায়ী সদস্যদের সদস্যপদ রহিত হইলে তাহার নতুন আবেদনপত্র পেশের মাধ্যমে এবং সদস্য পদ হারানোর সময় হইতে অদ্যাবধি তাহার সকল পাওনা পরিশোধ করিয়া পুনরায় সদস্য হিসাবে অন্তর্ভুক্ত হইতে পারিবেন। তবে, সংশ্লিষ্ট শাখার সুপারিশক্রমে কেন্দ্রীয় কাউন্সিলের তাহার নিকট হইতে প্রাপ্য অর্থের সম্পূর্ণ কিংবা অংশ বিশেষ মওকুফ করিবার ক্ষমতা রহিয়াছে। যে সকল সদস্যের সদস্যপদ ২.৩ বিধি অনুযায়ী বাতিল করা হইয়াছে, তাহার আবেদন পত্র দশজন সদস্যদের দ্বারা অন্তর্বর্তীকালীন সময় তিনি সদাচারনের পরিচয় দিয়েছেন এই সত্যায়নসহ সমর্থিত হইলে দুই বছর বা অধিককাল পরে তাহাকে পুনরায় সদস্য হিসাবে অন্তর্ভুক্ত করা যাইবে। কিন্তু যিনি এই বিধির অধীনে পদত্যাগ করিয়াছেন, তিনি সংশ্লিষ্ট শাখার সুপারিশক্রমে কেন্দ্রীয় কাউন্সিলের নিকট গ্রহণযোগ্য লিখিত ক্ষমা প্রার্থনা করিলে পুনরায় সদস্য হিসাবে অন্তর্ভুক্ত হইতে পারিবেন।

৩. শাখা গঠন :

৩.১ বাংলাদেশের অভ্যন্তরে বা বিদেশে পেশার উপযুক্ত সদস্যগণ যাহারা একস্থানে বসবাস চাকুরী কিংবা প্র্যাকটিস করেন তাহাদের সমবায় শাখা কমিটি গঠিত হইবে। শাখার এসোসিয়েশনের মডেল অনুযায়ী বিধি ও নিয়ম থাকিবে।

শাখাসমূহে কেন্দ্রীয় কাউন্সিল কর্তৃক অনুমোদিত উপধারা থাকিতে পারিবে। শাখা এসোসিয়েশনের কেন্দ্রীয় কার্যালয়ে শাখা কর্মকর্তাদের নাম, সদস্যদের আবেদন পত্র অনুযায়ী সদস্যদের বিবরণ ও সদস্যদের চাঁদা হইতে কেন্দ্রীয় তহবিলে দেয় অংশ প্রেরণ করিবে। এসোসিয়েশনের কেন্দ্রীয় কার্যালয় কর্তৃক অনুমোদিত হইবার পর শাখা কার্যকর হইবে।

৩.২ শাখাসমূহের সাধারণ বিধি :

৩.২.১ একস্থানে বা কাছাকাছি জায়গায় কর্মরত/প্র্যাকটিসরত/বসবাসকারী অনূন্য ৪০ জন সদস্য একটি স্থানীয় শাখা গঠন করিতে পারিবে। ঢাকা জেলার অন্তর্গত নবাবগঞ্জ-দোহার শাখা, নীলফামারী জেলার অন্তর্গত সৈয়দপুর শাখা ও মৌলভীবাজার জেলার অন্তর্গত শ্রীমঙ্গল শাখা ব্যতীত নতুন করে কোন অবস্থায় একই ভৌগলিক জেলায় একাধিক শাখা গঠিত হইবে না।

৩.২.২ শাখাসমূহ বার্ষিক রিপোর্ট প্রণয়নের জন্য প্রতি ছয় মাস অন্তর অক্টোবর ও এপ্রিলের শেষ দিনে সদস্যদের তালিকা, চাঁদা বাকি পড়েছে এমন সদস্যদের নাম সম্ভব হইলে যাহারা শাখা পরিত্যাগ করিয়াছেন তাহাদের নতুন ঠিকানা এবং শাখার কার্যক্রমের বিবরণীর দুই কপি কেন্দ্রীয় কার্যালয়ে পেশ করিবে। শাখাসমূহ নতুন সদস্যদের নাম ও সদস্যদের ঠিকানা পরিবর্তিত হইলে অবিলম্বে কেন্দ্রীয় কার্যালয়ে জানাইবে। কেন্দ্রীয় কার্যালয় যাহাতে তাহার সকল শাখার কার্যক্রম সম্পর্কে পরিপূর্ণভাবে অবহিত থাকে সেই জন্য শাখাসমূহ নিয়মিত ভাবে কার্যালয়ে প্রেরণ করিবে।

৩.২.৩ আভ্যন্তরীণ ব্যবস্থাপনার ক্ষেত্রে শাখাসমূহ স্বায়ত্বশাসিত হইবে। তাহাদের বিধি-বিধানসমূহ বাংলাদেশ মেডিক্যাল এসোসিয়েশন (কেন্দ্র) এর অনুরূপ হইবে। তবে, তাহার স্থানীয় অবস্থার বিবেচনায় নিজস্ব উপধারা প্রণয়ন করিতে পারিবেন এবং ইহা কেন্দ্রীয় কাউন্সিলের অনুমোদনের জন্য পেশ করিবেন।

৩.২.৪ বাংলাদেশ মেডিক্যাল এসোসিয়েশন (কেন্দ্র) তার কোন শাখার ঋণ বা দায়ের জন্য দায়ী থাকিবে না। অনুরূপভাবে, কোন শাখা ও কেন্দ্রের ঋণ বা দায়ের জন্য দায়ী থাকিবে না।

৩.৩ শাখার ব্যবস্থাপনা :

শাখার ব্যবস্থাপনা ও কার্যক্রমের দায়িত্বপ্রাপ্ত হইবে নির্বাচিত শাখা কার্যকরী কমিটি।

৩.৩.১ শাখার সাধারণ সভা : ইহা হইবে শাখার সর্বোচ্চ পরিষদ।

৩.৩.২ এসোসিয়েশনের সিদ্ধান্তসমূহ বাস্তবায়নের জন্য শাখা কার্যকরী কমিটি নিম্নবর্ণিত ভাবে গঠিত হইবে।

সভাপতি : ১ জন

সহ-সভাপতি : ১ বা ২ জন

কোষাধ্যক্ষ : ১ জন

সাধারণ সম্পাদক : ১ জন

যুগ্ম সম্পাদক : ১ জন

সাংগঠনিক সম্পাদক : ১ জন

বিভাগীয় সম্পাদক : ৬ জন (কেন্দ্রীয় কার্যকরী কমিটির অনুরূপ, তবে শাখায় আন্তর্জাতিক বিষয়ক সম্পাদকের

পদ থাকিবে না) ।

সদস্য : ৪ হইতে ১০ জন

পদাধিকার বলে সদস্য :

অব্যবহিত প্রাক্তন সভাপতি

অব্যবহিত প্রাক্তন সাধারণ সম্পাদক

শাখা হইতে নির্বাচিত কেন্দ্রীয় কাউন্সিলের সদস্যবৃন্দ :

কো-অপ্টেড সদস্য ২ জন

শাখার সভাপতি বা সাধারণ সম্পাদক পুনরায় নির্বাচিত হলে তাহার বা তাহাদের স্থলে অতিরিক্ত অরেকজন করে কো-অপ্টেড সদস্য করা যাবে ।

৩.৩.৩ এক গোপন ব্যালটের মাধ্যমে সংশ্লিষ্ট শাখার সদস্যদের দ্বারা প্রতি দুই বছর অন্তর শাখার কার্যকরী পরিষদ গঠিত হইবে এবং কর্মকর্তা ও শাখার কার্যকরী পরিষদের নাম নির্বাচনের কার্য বিবরণীসহ কেন্দ্রীয় কার্যালয়ে প্রেরণ করিতে হইবে ।

৪. সাধারণ পরিষদ :

৪.১ কাজ ও ক্ষমতা :

সাধারণ পরিষদ এসোসিয়েশনের সাধারণ কার্যক্রম পরিচালনা ও নিয়ন্ত্রণ করিবে এবং ইহা নিম্নোক্ত ক্ষমতা থাকিবে :

৪.১.১ সংগঠনের কক্ষ, লাইব্রেরী ও সম্পত্তির প্রশাসন এবং প্রকাশনা সমূহের সংগঠন ও পরিচালনার জন্য বিধিসমূহ প্রণয়ন, পরিবর্তন বা রদ করা ।

৪.১.২ এসোসিয়েশনের বিধি ও উপধারাসমূহ প্রণয়ন, সংশোধন বা রদ করা ।

৪.১.৩ কমিটি বা স্থায়ী কমিটি যথা অর্থ কমিটি, গবেষণা কমিটি ইত্যাদি গঠন করা ।

৪.১.৪ সরকার অথবা যথাযথভাবে গঠিত কর্তৃপক্ষের নিকট, এসোসিয়েশন বা চিকিৎসা পেশার স্বার্থ সংশ্লিষ্ট কোন বিষয়ে প্রতিনিধি প্রেরণ করা ।

৪.১.৫ কোন সদস্যের পদত্যাগ এবং কোন শাখা বা সদস্যের বিরুদ্ধে শৃংখলাজনিত কার্যক্রম বিবেচনা ও সিদ্ধান্ত গ্রহন করা ।

৪.১.৬ প্রয়োজনবোধে কোন সদস্য বা শাখার বাকি পাওনার সম্পূর্ণ বা অংশ বিশেষ মওকুফ করা ।

৪.১.৭ বিধি পরিবর্তন ব্যতিরেকে অন্যান্য কয়েকটি বা সকল ক্ষমতা কেন্দ্রীয় কাউন্সিলের পরবর্তী সভা পর্যন্ত কেন্দ্রীয় কাউন্সিলের উপর ন্যস্ত করা ।

৪.১.৮ সংগঠনের জন্য বেতনভুক্ত কর্মচারী নিয়োগ বা চাকুরীচ্যুত করা ।

৪.১.৯ এই সকল বিধি দ্বারা প্রদত্ত সুনির্দিষ্ট ছাড়াও সংগঠনের সাধারণ সভায় সুনির্দিষ্ট ভাবে আইনগত ভাবে ব্যাখ্যা করা নাই সংগঠনের পক্ষে এমন কোন কাজেও নিজের ক্ষমতা ব্যবহার করা ।

পাদটিকা এই সকল বিধি বহির্ভূত অন্যান্য সকল বিষয়েও সাধারণ সভার সিদ্ধান্ত চূড়ান্ত বলিয়া গণ্য হইবে ।

সাধারণ পরিষদের তিন ধরনের সভা হইতে পারে :

১. বার্ষিক সাধারণ সভা ।

২. তলবী সভা ।

৩. জরুরী বা বিশেষ সভা ।

8.২ সাধারণ পরিষদের সভা :

সাধারণ পরিষদের সভার আহ্বানের পদ্ধতি নিম্নরূপ :

8.২.১ **বার্ষিক সাধারণ সভা :** কেন্দ্রীয় কাউন্সিলের সিদ্ধান্তক্রমে একটি সুবিধাজনক স্থান, তারিখ ও সময়ে বার্ষিক সাধারণ সভা অনুষ্ঠিত হইবে। বার্ষিক সাধারণ সভা সাধারণভাবে বার্ষিক সম্মেলনের স্থানে অনুষ্ঠিত হইবে।

8.২.২ **তলবী সভা :** অনূন্য ১০০০ জন সদস্যের স্বাক্ষরিত তলবী সভা আহ্বানের আলোচ্যসূচী জানাইয়া আবেদন লাভের ছয় সপ্তাহের মধ্যে সাধারণ পরিষদের তলবী সভা আহ্বান করিতে হইবে। সভাপতির সহিত পরামর্শক্রমে মহাসচিব সময়, স্থান ও তারিখ স্থির করিবেন।

8.২.৩ **জরুরী বা বিশেষ সভা :** সভাপতির সহিত পরামর্শক্রমে মহাসচিব আহ্বান করিবেন। যদি নির্দিষ্ট সময়ের মধ্যে মহাসচিব সভা আহ্বান করিতে ব্যর্থ হন তবে সভাপতি সভা আহ্বানের অধিকার সংরক্ষণ করেন।

8.৩ বিজ্ঞপ্তি :

সকল সদস্যদের সভার স্থান, তারিখ ও সময় এবং সভার আলোচ্য সূচী জানিয়ে অন্ততঃ পক্ষে ৩০ দিনের নোটিশ প্রদান করিতে হইবে। জরুরী অবস্থায় মহাসচিবের ক্ষমতাক্রমে সভাপতির সহিত পরামর্শে আরও অল্প সময়ের নোটিশে সভা আহ্বান করা যাইতে পারে, তবে ইহা কোন অবস্থায় ১৫ দিনের কম হইতে পারিবে না। বার্ষিক সাধারণ সভার ক্ষেত্রে সাধারণভাবে ৩ মাসের নোটিশ প্রদান করিতে হইবে।

8.৪ কোরাম :

বার্ষিক সাধারণ সভা ও বিশেষ বা জরুরী সভায় ৩০০ জনে এবং তলবী সভায় ১০০০ জনে কোরাম হইবে।

8.৫ সাধারণ পরিষদের বার্ষিক সাধারণ সভা :

বার্ষিক সাধারণ সভায় নিম্নোক্ত বিষয়াদি আলোচিত হইবে :

8.৫.১ প্রয়োজনবোধে (সভাপতির অনুপস্থিতিতে) সভাপতি নির্বাচন।

8.৫.২ মহাসচিবের পূর্ববর্তী বৎসরের বার্ষিক রিপোর্ট।

8.৫.৩ কোষাধ্যক্ষের রিপোর্ট ও অডিটকৃত হিসাব নিকাশ গ্রহণ।

8.৫.৪ আগামী বৎসরের বাজেট বিবেচনা।

8.৫.৫ অডিটর নিয়োগ।

8.৫.৬ শাখা সমূহ হইতে প্রদত্ত প্রস্তাব সমূহ।

8.৫.৭ এসোসিয়েশনের সদস্যদের নিকট হইতে প্রস্তাব সমূহ।

8.৫.৮ সভাপতির অনুমতিক্রমে অন্য যে কোন বিষয়।

৪.৬ সাধারণ পরিষদের বার্ষিক সাধারণ সভার সাধারণ নিয়মাবলী :

- ৪.৬.১ সভাপতির বিশেষ অনুমতি ব্যতিরেকে পূর্ব নোটিশ দেওয়া ও যথারীতি আলোচ্যসূচীর সহিত বিতরণ করা হয়নি এই ধরনের কোন প্রস্তাব সাধারণ পরিষদের বার্ষিক সাধারণ সভায় পেশ করা যাইবে না।
- ৪.৬.২ বিভিন্ন সদস্যের পেশকৃত প্রস্তাব সংশ্লিষ্ট শাখার মাধ্যমে বাংলাদেশ মেডিক্যাল এসোসিয়েশনের মহাসচিবের নিকট পৌঁছাইতে হইবে। তবে সংশ্লিষ্ট শাখার নিকট কপি পাঠাইয়া, প্রস্তাব সরাসরি বাংলাদেশ মেডিক্যাল এসোসিয়েশনের মহাসচিবের নিকট প্রেরণ করিতে পারিবেন।
- ৪.৬.৩ সাধারণ পরিষদের বার্ষিক সভায় পেশ করার জন্য প্রস্তাবের নোটিশ সভার নির্দিষ্ট তারিখের অন্ততঃ এক মাস পূর্বে বাংলাদেশ মেডিক্যাল এসোসিয়েশনের মহাসচিবের নিকট প্রেরণ করিতে পারিবেন।

৪.৭ সভার কার্যক্রম সম্পর্কে সাধারণ নিয়মাবলী :

- ৪.৭.১ সকল সভার কার্যবিবরণী সাধারণ পরিষদের পরবর্তী সাধারণ সভার সভাপতি কর্তৃক শুদ্ধ ও যথার্থ বলিয়া ঘোষিত হইতে হইবে।
- ৪.৭.২ সভায় কোন প্রস্তাব গৃহীত বা নাকচ হইলে, তাহা সাধারণ পরিষদ বা এসোসিয়েশনের এক পঞ্চমাংশ সদস্যের স্বাক্ষর সহ পুনর্বিবেচনার জন্য রিকুইজিশন না প্রদান করিলে ৬ মাসের জন্য বিবেচিত হইবে না।
- ৪.৭.৩ সভায় সভাপতি সভা মূলতবী ঘোষণা করিতে পারেন এবং যদি উপস্থিত সদস্যদের অর্ধেকের বেশী মূলতবী চায় তবে মূলতবী ঘোষণা করিবেন। মূলতবী সভায় শুধু মাত্র অসমাপ্ত আলোচ্যসূচী আলোচিত হইবে।
- ৪.৭.৪ যে সকল বিষয়ের জন্য নির্দিষ্ট সংখ্যাগরিষ্ঠতা প্রয়োজন, তাহাদের ব্যতিরেকে সভায় পেশকৃত প্রস্তাব সমূহে সাধারণ সংখ্যাগরিষ্ঠতায় সিদ্ধান্ত গৃহীত হইবে। সাধারণ ভাবে হাত তুলিয়া ভোট গ্রহণ করা হইবে। কিন্তু সভাপতি সিদ্ধান্ত গ্রহণ করিলে কিংবা উপস্থিত সদস্যদের এক তৃতীয়াংশ দাবী করিলে ব্যালটের মাধ্যমে সিদ্ধান্ত গ্রহণ করিতে হইবে।
- ৪.৭.৫ সভার সভাপতি উভয়পক্ষে সমান সংখ্যক ভোট প্রদত্ত হইলে কাষ্টিং ভোট প্রদান করিবেন।
- ৪.৭.৬ তলবী ও বিশেষ সভায় যে আলোচ্যসূচীর জন্য সভা আহ্বান করা হইয়াছে, তাহা ব্যতিরেকে অন্য কোন বিষয় আলোচনা করিতে পারিবে না।
- ৪.৭.৭ কোন শূন্যপদ, বেআইনী নিযুক্তি, কোন সদস্যের নির্বাচন বা অসাবধানতাবশতঃ কোন সদস্যকে নোটিশ প্রদানে ভ্রান্তির কারণে সভার কার্যবিবরণী অবৈধ হইবে না।

৪.৮ জরুরী অথবা তলবী সভার কার্যক্রম :

- ৪.৮.১ যে আলোচ্যসূচীর জন্য সভা আহ্বান করা হইয়াছে, তাহা ব্যতিরেকে অন্য কোন বিষয় জরুরী বা তলবী সভায় আলোচনা করা যাইবে না।
- ৪.৮.২ যদি কোন সভা সদস্যদের রিকুইজিশনে আহ্বান করা হয় এবং সভার নির্দিষ্ট সময়ের আধ ঘণ্টার মধ্যে কোরাম না হয় তবে সভা বাতিল হইবে। কিন্তু জরুরী সভার ক্ষেত্রে সভা মূলতবী থাকিবে এবং সভার সহিত পরামর্শক্রমে মহাসচিব পুনরায় সভা আহ্বান করিবেন এবং সভার স্থান, তারিখ ও সময় স্থির করা হইবে। মূলতবী সভায় কোন কোরামের প্রয়োজন পড়িবে না।

৫. কেন্দ্রীয় কাউন্সিল :

৫.১ ক্ষমতা ও কর্তব্য :

কেন্দ্রীয় কাউন্সিল এসোসিয়েশনের স্মারকলিপি ও উপধারা সমূহ অনুযায়ী এসোসিয়েশনের সাধারণ কার্যক্রম নিয়ন্ত্রণ ও পরিচালনা করিবেন। সাধারণ পরিষদের গৃহীত প্রস্তাব সমূহ বাস্তবায়ন করা কেন্দ্রীয় কাউন্সিলের দায়িত্ব। ইহা সাধারণ ভাবে প্রতি তিন মাস অন্তর্গত বৈঠকে বসিবে। কেন্দ্রীয় কাউন্সিলের নিম্নবর্ণিত ক্ষমতা ও কর্তব্য থাকিবে :

- ৫.১.১ শাখা সমূহ গঠন অনুমোদন করা এবং কোন শাখা বা সদস্যের বিরুদ্ধে শৃংখলাজনিত ব্যবস্থা গ্রহণ করা।
- ৫.১.২ সভাপতি ও মহাসচিব ব্যতিরেকে কর্মকর্তাদের কোন পদ শূণ্য হইলে অবশিষ্ট মেয়াদের জন্য কেন্দ্রীয় কার্যকরী পরিষদের কোন সদস্যকে কার্যভার গ্রহণ করিবার দায়িত্ব প্রদান করা।
- ৫.১.৩ বিশেষ কাউন্সিল, কমিটি, উপ-পরিষদ, বোর্ড বা অন্যান্য সংস্থা নিয়োগ করা এবং কেন্দ্রীয় কাউন্সিলের কোন কোন ক্ষমতা তহাদের উপর অর্পণ করা।
- ৫.১.৪ সাধারণ পরিষদের অনুমোদন সাপেক্ষে এসোসিয়েশনের বিধি বা উপধারা প্রণয়ন, পরিবর্তন বা বাতিল করা।
- ৫.১.৫ সাধারণ পরিষদের সম্মতি সাপেক্ষে এসোসিয়েশনের কক্ষ, লাইব্রেরী ও সম্পত্তি রক্ষণাবেক্ষণ ও প্রশাসনের জন্য এবং প্রকাশনাসমূহ সংগঠিত ও পরিচালনার জন্য বিধি ও উপধারা সমূহ প্রণয়ন, সংশোধন বা বাতিল করা।
- ৫.১.৬ ১৪নং ধারার অধীনে গঠিত “কেন্দ্রীয় কার্যকরী পরিষদের” সংরক্ষিত নির্ধারিত কার্যক্রম ও বিধি সমূহ পরিবর্তন সম্পর্কিত কার্যাবলী ব্যতিরেকে কেন্দ্রীয় কাউন্সিল তার সকল বা কিছু ক্ষমতা অন্যদের উপর অর্পণ করিতে পারিবে।
- ৫.১.৭ সাধারণ পরিষদের অনুমোদন সাপেক্ষে কেন্দ্রীয় কাউন্সিল, প্রয়োজন বিবেচনা করিলে কোন শাখার কিংবা অপর কোন পাণ্ডনার সম্পূর্ণ বা অংশ বিশেষ মওকুফ করিতে পারিবে।
- ৫.১.৮ এসোসিয়েশনের বা চিকিৎসা পেশার স্বার্থে প্রভাবিত হইতেছে বিবেচনা করিলে কেন্দ্রীয় কাউন্সিল সরকার, কোন সংস্থা বা যথাযথভাবে গঠিত কর্তৃপক্ষের নিকট কোন বিষয়ে সংগঠনের প্রতিনিধিত্ব করিতে পারিবে।
- ৫.১.৯ কেন্দ্রীয় কাউন্সিল মূল জাতীয় স্বাস্থ্য বিষয়াদি যথা জাতীয় স্বাস্থ্যনীতি, মেডিক্যাল শিক্ষা, ঔষধনীতি, স্বাস্থ্য সংক্রান্ত আইন সমূহ ইত্যাদি সম্পর্কে সিদ্ধান্ত গ্রহণ করিবে। যদি কোন বিশেষ কারণে কেন্দ্রীয় কার্যকরী পরিষদ এই সকল বিষয়ে কোন সিদ্ধান্ত গ্রহণ করিতে বাধ্য হয় তবে স্বল্পতম সময়ে ও সুযোগে অনুষ্ঠিত কেন্দ্রীয় কাউন্সিলের সভায় ইহা অনুমোদন করাইতে হইবে।
- ৫.১.১০ কেন্দ্রীয় কার্যকরী পরিষদ যাহাতে বাজেট বরাদ্দের মধ্যে ব্যয় করে তাহা কেন্দ্রীয় কাউন্সিল তত্ত্বাবধান করিবে। যদি কোন বিশেষ কারণে কেন্দ্রীয় কার্যকরী পরিষদ ইহা পরিবর্তন করে তবে তাহা কেন্দ্রীয় কাউন্সিলের সভায় অনুমোদন করাইতে হইবে।
- ৫.১.১১ কেন্দ্রীয় কাউন্সিল এই সকল বিধি অনুযায়ী প্রত্যক্ষভাবে প্রদত্ত ক্ষমতা সমূহের বাইরেও এসোসিয়েশনের জন্য সকল কাজ করিবার ক্ষমতা প্রয়োগ করিতে পারিবে।

৬. কেন্দ্রীয় কাউন্সিলের সভা :

সাধারণভাবে প্রতি তিন মাসে একবার কেন্দ্রীয় কাউন্সিলের সভা আহ্বান করা হইবে। সভাপতির সাথে পরামর্শক্রমে মহাসচিবের সিদ্ধান্তে সুবিধাজনক স্থানে, তারিখ ও সময়ে কেন্দ্রীয় কাউন্সিলের সভা অনুষ্ঠিত হইবে।

কেন্দ্রীয় কাউন্সিলের অন্ততঃপক্ষে ১০ জন সদস্য স্বাক্ষরিত ও লিখিত ভাবে কি বিষয় আলোচনার জন্য বিশেষ সভা আহ্বান করা প্রয়োজন জানাইয়া রিকুইজিশন পেশ করিলে ইহার ৪ সপ্তাহের মধ্যে মহাসচিব সভাপতির পরামর্শক্রমে কেন্দ্রীয় কাউন্সিলের বিশেষ তলবী সভা আহ্বান করিবেন।

৭. কেন্দ্রীয় কাউন্সিলের সভার বিজ্ঞপ্তি :

সভার স্থান, তারিখ ও সময় এবং আলোচ্য সূচী জানাইয়া সকল সদস্যকে অন্ততঃপক্ষে ২ সপ্তাহের নোটিশ প্রদান করিতে হইবে।

জরুরী অবস্থায় সভাপতির পরামর্শক্রমে মহাসচিবের সিদ্ধান্তে আরো অল্প নোটিশে সভা আহ্বান করা যাইবে, তবে ইহা কোন ক্ষেত্রে চার দিনের কম হইবে না।

৮. কোরামঃ

কেন্দ্রীয় কাউন্সিলের সভার কোরাম হইবে ৫০ জন, তাহাদের অন্ততঃ দুইজন এসোসিয়েশনের কর্মকর্তা ও কেন্দ্রীয় কার্যকরী পরিষদের বাহিরের ব্যক্তি হইতে হইবে। বিশেষ তলবী সভার কোরাম হইবে ১০০ জন।

৯. কেন্দ্রীয় কাউন্সিলের বার্ষিক সভার আলোচ্য সূচী :

বার্ষিক সাধারণ সভার স্থলে ইহার অব্যবহিত পূর্বে কেন্দ্রীয় কাউন্সিলের সভা অনুষ্ঠিত হইবে। এই সভাকে “কেন্দ্রীয় কাউন্সিলের বার্ষিক সভা” বলিয়া অভিহিত করা হইবে এবং সভায় অন্যান্য বিষয়ের সহিত নিম্নবর্ণিত বিষয় আলোচিত হইবে :

- ৯.১ এসোসিয়েশনের বিগত বৎসরের কার্যক্রমের নিম্নোক্ত রিপোর্ট গ্রহণ।
 - ৯.১.১ মহাসচিবের রিপোর্ট।
 - ৯.১.২ বাংলাদেশ মেডিক্যাল এসোসিয়েশনের জার্নালের ম্যানেজিং সেক্রেটারীর রিপোর্ট।
- ৯.২ কোষাধ্যক্ষ কর্তৃক পেশকৃত বিগত বৎসরের অডিটকৃত হিসাব নিকাশ।
- ৯.৩ কোষাধ্যক্ষ কর্তৃক পেশকৃত আগামী বৎসরের বাজেট।
- ৯.৪ অডিটর নিয়োগের প্রস্তাব বিবেচনা।
- ৯.৫ আইনজ্ঞ পরামর্শদাতা নিয়োগের প্রস্তাব বিবেচনা।
- ৯.৬ গঠনতন্ত্রের উপধারা সমূহের প্রস্তাবিত সংশোধনী (যদি থাকে) বিবেচনা।
- ৯.৭ বার্ষিক সাধারণ সভায় পেশ করার জন্য প্রস্তাব সমূহ বিবেচনা।
- ৯.৮ সভাপতির অনুমতিক্রমে অন্য কোন বিষয়।

১০. কেন্দ্রীয় কাউন্সিলের সাধারণভাবে সভার সাধারণ নিয়মাবলী :

- ১০.১ পূর্ব নোটিশ প্রদান ও যথারীতি বিতরণ ব্যতিরেকে, সভাপতির বিশেষ অনুমতি ছাড়া, অন্য কোন প্রস্তাব কেন্দ্রীয় কাউন্সিলের বার্ষিক সভায় আলোচিত হইবে না।
- ১০.২ সদস্যদের দ্বারা পেশকৃত প্রস্তাব সমূহ স্থানীয় শাখার মাধ্যমে মহাসচিবের নিকট পৌছাইতে হইবে। কিন্তু স্থানীয় শাখায় কপি প্রেরণ করিয়া যে কোন সদস্য তাহার প্রস্তাব সরাসরি মহাসচিবের নিকট প্রেরণ করিতে পারিবেন।

১০.৩ সভায় প্রস্তাব পেশ করার নোটিশ মহাসচিবের নিকট কেন্দ্রীয় কাউন্সিলের সভার অন্ততঃ ১ সপ্তাহ পূর্বে পৌঁছাইতে হইবে।

১১. কেন্দ্রীয় কার্যকরী পরিষদ :

১১.১ কাজ ও ক্ষমতা :

কেন্দ্রীয় কার্যকরী পরিষদ কার্যনির্বাহী কর্তৃপক্ষ থাকিবে এবং কেন্দ্রীয় কাউন্সিলের নির্ধারিত নীতি ও কার্যক্রম বাস্তবায়িত করার অধিকারী হইবে ও কেন্দ্রীয় কাউন্সিলের নিকট এই জন্য দায়ী থাকিবে। কেন্দ্রীয় কার্যকরী পরিষদের নিম্নবর্ণিত ক্ষমতা থাকিবে।

১১.১.১ এসোসিয়েশনের যথাযথ কাজকর্ম এবং এসোসিয়েশনের কক্ষ, লাইব্রেরী ও সম্পত্তির প্রশাসন ও রক্ষণাবেক্ষন এবং ইহার প্রকাশনা সমূহের সংগঠন ও রক্ষণাবেক্ষনের জন্য বিধি ও নির্দেশ প্রদান।

১১.১.২ যখন প্রয়োজন মনে হয় কমিটি, উপ-পরিষদ, এডহক কমিটি স্থায়ী কমিটি নিয়োগ।

১১.১.৩ এসোসিয়েশন অথবা চিকিৎসা পেশার স্বার্থ ব্যতীত হইতেছে বিবেচনা করিলে যে কোন বিষয়ে সরকার, কোন গণ সংগঠন কিংবা যথাযথভাবে গঠিত কর্তৃপক্ষের সম্মুখে প্রতিনিধি প্রেরণ করা।

১১.১.৪ কোন সদস্যপদ অথবা শাখা বিবেচিত হইলে স্থগিত ঘোষণা করা এবং কোন শাখা বা সদস্যের বিরুদ্ধে অসদাচরণ, ইচ্ছাকৃত অবহেলা বা ব্যর্থতার জন্য যে শৃঙ্খলা জনিত ব্যবস্থা যথাযথ বিবেচিত হয় তাহা গ্রহণ করা।

১১.১.৫ এসোসিয়েশনের বেতনভুক্ত কর্মচারীদের নিয়োগ ও অপসারণ করা।

১১.১.৬ এসোসিয়েশনের কর্মকর্তা, জার্নাল, কেন্দ্রীয় কাউন্সিল, কেন্দ্রীয় কার্যকরী পরিষদ, এডহক কমিটি, উপ-পরিষদ সমূহের সদস্যদের ভ্রমণভাতা স্থির করা।

১১.১.৭ কেন্দ্রীয় কাউন্সিলে আলোচনার পূর্বে সকল বিষয় বিবেচনা করা এবং প্রয়োজনীয় সুপারিশ পেশ করা।

১১.১.৮ বিধি ও বিধান সমূহের অধীনে, এই সকল ক্ষমতা ছাড়াও, কেন্দ্রীয় কাউন্সিল কর্তৃক ন্যস্ত হইলে, অন্যান্য কাজ ও দায়িত্ব পালন করা।

১২. কেন্দ্রীয় কার্যকরী পরিষদের সভা :

১২.১ ইহা প্রয়োজন মত অনুষ্ঠান করিবে। তবে সাধারণভাবে মাসে একবার সভা অনুষ্ঠিত হইবে।

১২.২ বিজ্ঞপ্তি :

সভার স্থান, তারিখ ও সময় জানাইয়া সকল সদস্যকে অন্ততঃ ৭ দিনের নোটিশ প্রদান করিতে হইবে। সভার আলোচ্য সূচী নোটিশের সাথে প্রেরণ করা হইবে।

কোন জরুরী অবস্থায়, সভাপতির সম্মতিক্রমে মহাসচিব আরো কম সময়ের নোটিশে কেন্দ্রীয় কার্যকরী পরিষদের সভা আহ্বান করিতে পারেন।

১২.৩ সভার কোরাম হইবে ৯ জন, যাহাদের মধ্যে অন্ততঃ দুইজন কর্মকর্তাদের বাইরে থাকিবেন।

১২.৪ স্থান : মহাসচিব সভাপতির সহিত পরামর্শক্রমে কেন্দ্রীয় কার্যকরী পরিষদের সভার সুবিধাজনক স্থান, সময় ও তারিখ স্থির করিবেন।

১৩. সভা সমূহের সাধারণ নিয়মাবলী :

- ১৩.১ সভার কার্যবিবরণী শুদ্ধভাবে রক্ষিত হইবে এবং যথারীতি পরবর্তী কেন্দ্রীয় কার্যকরী পরিষদের, কেন্দ্রীয় কাউন্সিলের বা সাধারণ পরিষদের সভায় যথার্থ বলিয়া ঘোষিত হইবে।
- ১৩.২ সভার কোন প্রস্তাব গৃহীত বা নাকচ হইলে তাহা ৬ মাস পূর্ণ কিংবা কেন্দ্রীয় কাউন্সিল বা সংশ্লিষ্ট উপ-পরিষদের এক পঞ্চমাংশ সদস্য পুনর্বিবেচনার জন্য লিখিত ভাবে দাবী না করিলে পুনর্বিবেচিত হইবে না।
- ১৩.৩ **বিশেষত :** সভায় উপস্থিত সদস্যদের অধিকাংশ মূলতবীর পক্ষে থাকিলে, প্রয়োজন মনে করিলে সভার সভাপতি সভা মূলতবী ঘোষণা করিতে পারিবেন। মূলতবী সভায় শুধুমাত্র সভার অসমাপ্ত বিষয়াদি বিবেচিত হইবে।
- ১৩.৪ বিশেষ ও তলবী সভায় আলোচ্যসূচীর বাইরে অন্য কোন বিষয় আলোচিত হইবে না।
- ১৩.৫ যে কোন সদস্যের উপর এসোসিয়েশনের কোন কর্মচারী দ্বারা ব্যক্তিগত ভাবে কিংবা সার্টিফিকেট অব পোষ্টিং এর মারফত ডাকযোগে প্রেরণ করিয়া নোটিশ প্রদান করা যাইতে পারে।
- ১৩.৬ সদস্যদের রিকুইজিশনের আলত সভার সভাপতি কর্তৃক স্থিরকৃত নির্দিষ্ট সময়ের আধ ঘন্টার মধ্যে কোরাম না হইলে সভা বাতিল হইবে। কিন্তু অন্যান্য ক্ষেত্রে সভা মূলতবী থাকিবে এবং পরবর্তীতে মহাসচিব কর্তৃক সভাপতির পরামর্শক্রমে পুনরায় আহ্বান করা যাইবে এবং সেই সভায় যে সংখ্যক সদস্যই উপস্থিত থাকেন কোরাম গঠন করিবেন ও সভার কার্য চালাইয়া যাইবেন।

১৪. এসোসিয়েশনের জার্নাল/পত্রিকা :

এসোসিয়েশনের আনুষ্ঠানিক মুখপত্র হিসাবে এসোসিয়েশনের জার্নালের পরিচালনার জন্য কেন্দ্রীয় কার্যকরী পরিষদ সম্পাদক মন্ডলীর সভাপতি ও সম্পাদক সহ একটি সম্পাদক মন্ডলী এবং ব্যবস্থাপক সহ একটি ব্যবস্থাপক কমিটি নির্বাচিত করিবেন। এসোসিয়েশন একটি মেডিক্যাল পত্রিকা ও একটি সাময়িকী প্রকাশ করিবেন। যাহা বিএমএ'র সংবাদ সহ চিকিৎসা বিষয়ক দেশীয় ও আন্তর্জাতিক খবরা-খবর পরিবেশন করিবে।

১৫. আয় :

নিম্নলিখিত সূত্র হইতে এসোসিয়েশনের আয় বা তহবিল আসিবে :

- ১৫.১ শাখার সদস্য তালিকা বাবদ কেন্দ্রীয় তহবিলে দেয় অংশ।
- ১৫.২ সরাসরি অথবা শাখা সমূহের মাধ্যমে বিশেষ চাঁদা বা দানের দ্বারা।
- ১৫.৩ এসোসিয়েশনের জার্নাল, পত্রিকা ও অন্যান্য প্রকাশনার মাধ্যমে।
- ১৫.৪ বাংলাদেশ মেডিক্যাল সম্মেলনে শাখা সমূহের চাঁদা এবং বাংলাদেশ মেডিক্যাল সম্মেলনের আয়।
- ১৫.৫ যে সকল ব্যক্তি এসোসিয়েশনে সাহায্য করিতে ইচ্ছুক তাহাদের সাহায্যে।
- ১৫.৬ দ্বিতীয় খন্ডের ১৯ ধারা অনুযায়ী সংশ্লিষ্ট সংস্থা সমূহের চাঁদা।
- ১৫.৭ কেন্দ্রীয় কাউন্সিল বা কেন্দ্রীয় কার্যকরী পরিষদ কর্তৃক স্বীকৃত অন্য কোন উৎস।

১৬. সংরক্ষিত তহবিল :

এসোসিয়েশনের একটি সংরক্ষিত তহবিল থাকিবে। প্রতি বছরের উদ্ধৃত অর্থের অন্ততঃ শতকরা ৩০ ভাগ এই

তহবিলে জমা হইবে। যথারীতি নোটিশ প্রদান করিয়া আলত কেন্দ্রীয় কাউন্সিলের সভায় উপস্থিত সদস্যদের তিন চতুর্থাংশ অংশদ্বারা সমর্থিত বিশেষ প্রস্তাবের মাধ্যমে এই তহবিল হইতে অর্থ তোলা যাইবে।

১৭. ব্যয় :

এসোসিয়েশনের কার্যক্রম চালানোর জন্য কেন্দ্রীয় কাউন্সিল অথবা কেন্দ্রীয় কার্যকরী পরিষদ এসোসিয়েশনের তহবিল হইতে সকল সাধারণ খরচ এবং প্রয়োজন মত ভাড়া, বেতন ও অন্যান্য খরচ করিবেন। ইহার মধ্যে জার্নাল ও অন্যান্য প্রকাশনা বাবদ স্বীকৃত ব্যয় রহিয়াছে। তাহারা এসোসিয়েশনের লক্ষ্য সমূহ অগ্রসর করিবার জন্য বৈজ্ঞানিক পরীক্ষাদি, সম্মেলন অনুষ্ঠান, পুরস্কার ও বৃত্তি প্রদান এবং অন্যান্য কাজে ব্যয় করার জন্য ক্ষমতা প্রাপ্ত হইবেন।

ব্যাংক একাউন্ট সভাপতি, মহাসচিব ও কোষাধ্যক্ষের যে কোন দুইজন পরিচালনা করিবেন।

১৮. সংগঠনের কর্মকর্তাবৃন্দ :

সংগঠনের কার্যাবলীর যথাযথ ব্যবস্থাপনার জন্য নিম্নলিখিত কর্মকর্তাগণ সংগঠনের সদস্যদের প্রত্যক্ষ ভোটে নির্বাচিত হইবেন। তাঁরা সাধারণভাবে প্রতি দুই বছর অল্প প্রত্যক্ষ ভোটে নির্বাচিত অন্যান্য কেন্দ্রীয় কার্যকরী পরিষদের সদস্যদের সহিত নির্বাচিত হইবেন।

সভাপতি : একজন

সহ-সভাপতি : ঢাকা মহানগরীর জন্য একজন এবং বাংলাদেশের প্রতিটি প্রশাসনিক বিভাগের জন্য একজন করিয়া।

মহাসচিব : একজন যিনি ঢাকা মহানগরীতে বসবাসকারী।

কোষাধ্যক্ষ : একজন যিনি ঢাকা মহানগরীতে বসবাসকারী।

যুগ্ম মহাসচিব : একজন

সাংগঠনিক সম্পাদক : একজন

বিভাগীয় সম্পাদক : ৭ জন (বিজ্ঞান বিষয়ক সম্পাদক, দপ্তর সম্পাদক, প্রচার ও জনসংযোগ কর্মকর্তা, সমাজ কল্যাণ সম্পাদক, সংস্কৃতি ও আপ্যায়ন বিষয়ক সম্পাদক, গ্রন্থাগার ও প্রকাশনা সম্পাদক এবং আন্তর্জাতিক বিষয়ক সম্পাদক)।

বিজ্ঞপ্তি : কোন ব্যক্তি সংগঠনের কোষাগার হইতে বেতন লাভ করিলে, তিনি সংগঠনের কর্মকর্তা, কেন্দ্রীয় কার্যকরী পরিষদের সদস্য অথবা কেন্দ্রীয় কাউন্সিলের সদস্য হইতে পারিবেন না। “বেতন” বলিতে যাতায়াত ও অন্যান্য ভাতা কিংবা সম্মানী বুঝাইবে না।

১৯. কার্যকালের সময়সীমা :

১৯.১ প্রতি দুই বছর অন্তর উত্তরাধিকার নির্বাচিত ঘোষিত না হওয়া অবধি কর্মকর্তা, কেন্দ্রীয় কার্যকরী পরিষদের সদস্য ও কেন্দ্রীয় কাউন্সিলের সদস্যবৃন্দ স্থায়ী দায়িত্বে অধিষ্ঠিত থাকিবেন। এই নিয়ম শাখা সমূহের কার্যকরী কমিটির কর্মকর্তা ও সদস্যদের ক্ষেত্রেও প্রযোজ্য হইবে।

১৯.২ কর্মকর্তা ও কেন্দ্রীয় কার্যকরী পরিষদের কোন সদস্য কোন যথাযথ কারণ ব্যতিরেকে কেন্দ্রীয় কার্যকরী পরিষদের পরপর তিনটি নিয়মিত সভায় উপস্থিত না থাকিলে তাহার সদস্যপদ হারাইতে হইবে।

২০. কর্মকর্তাদের দায়িত্ব ও কর্তব্য :

২০.১ সভাপতি :

২০.১.১ সংগঠনের কার্যকরী পরিষদ, কেন্দ্রীয় কাউন্সিল ও কোন কমিটির তিনি সদস্য থাকিলে এই সকল সভায় তিনি সভাপতিত্ব করিবেন।

- ২০.১.২ বাংলাদেশ মেডিক্যাল সম্মেলন, সেমিনার, সম্মেলন ও অন্যান্য সভায় সভাপতিত্ব করিবেন।
- ২০.১.৩ সংগঠনকে পরিচালনা ও নিয়ন্ত্রণ করিবেন।
- ২০.১.৪ সভা সমূহের কার্যাবলী নিয়ন্ত্রণ এবং সন্দেহযুক্ত বিষয় সমূহের ব্যাপারে সিদ্ধান্ত প্রদান করিবেন।
- ২০.১.৫ তাহার সাধারণ ভোটের অতিরিক্ত উভয়পক্ষে ভোটের সমতা দেখা দিলে কাণ্ডিং ভোটের অধিকার থাকিবেন।
- ২০.১.৬ তিনি পদাধিকার বলে বিএমএ ডক্টরস ওয়েলফেয়ার ট্রাস্টের ট্রাস্টি বোর্ডের সদস্য থাকিবেন।

বিজ্ঞপ্তি :

সভাপতি দীর্ঘকালীন অসুস্থ, মৃত্যু, কারাবরণ, পদত্যাগ কিংবা বাংলাদেশ থেকে দীর্ঘদিন যাবৎ অনুপস্থিত থাকিলে, কেন্দ্রীয় কাউন্সিল কর্তৃক মনোনীত একজন সহ-সভাপতি সভাপতির দায়িত্ব পালন করিবেন। সভাপতি পদত্যাগ করিলে কেন্দ্রীয় কাউন্সিল সম্মত হইলেই ইহা কার্যকর হইবে এবং এই পদত্যাগপত্রের প্রতি এই সম্মতি প্রদানের পূর্ব পর্যন্ত একজন সহ-সভাপতি কার্য পরিচালনা করিবেন।

২০.২ সহ-সভাপতি :

- ২০.২.১ সভাপতির অনুপস্থিতিতে একজন সহ-সভাপতি কেন্দ্রীয় কার্যকরী পরিষদ, কেন্দ্রীয় কাউন্সিল এবং সাধারণ অধিবেশনের সভার সভাপতিত্ব করিবেন। তাহারা সভাপতি কর্তৃক কোন কার্যভার প্রদান করিলে তাহা পালন করিবেন।
- ২০.২.২ যে বিভাগের জন্য সহ-সভাপতি নির্বাচিত হইবেন সে বিভাগের সকল শাখার সহযোগিতায় অন্ততঃ একটি বিভাগীয় সম্মেলন আয়োজন করিবেন এবং শাখাসমূহের নৈকট্য বৃদ্ধিতে অবদান রাখিবেন।

২০.৩ মহাসচিব :

যুগ্ম মহাসচিব, সাংগঠনিক সম্পাদক ও বিভাগীয় সম্পাদকের সহযোগিতায় মহাসচিব

- ২০.৩.১ কেন্দ্রীয় কার্যালয়ের দায়িত্বে থাকিবেন।
- ২০.৩.২ সকল চিঠিপত্র প্রদান করিবেন।
- ২০.৩.৩ হিসাবের বহি তত্ত্বাবধান করিবেন, বিল পাশ করিবেন ও বিলের অর্থ প্রদান করিবেন এবং চেক সহি করিবেন।
- ২০.৩.৪ কেন্দ্রীয় কাউন্সিল কর্তৃক গ্রহণের জন্য অডিটরদের দ্বারা যথাযথভাবে অডিটকৃত বাৎসরিক হিসাব নিকাশ সম্মানী কোষাধ্যক্ষের দ্বারা প্রস্তুত করাইবেন।
- ২০.৩.৫ তিনি সভা সম্মেলন, বক্তৃতামালা ও প্রচারণামূলক কার্যক্রম আহ্বান, ব্যবস্থাপনা ও সংগঠিত করিবেন।
- ২০.৩.৬ তিনি কেন্দ্রীয় কাউন্সিল ও কেন্দ্রীয় কার্যকরী পরিষদের সভা সমূহে অংশ গ্রহন করিবেন এবং ইহার কার্যবিবরণী রক্ষা করিবেন।
- ২০.৩.৭ তিনি সকল কমিটির পদাধিকার বলে সদস্য থাকিবেন।
- ২০.৩.৮ তিনি সংগঠনের সকল সদস্যের নির্ভুল ও আপটুডেট তালিকার রেজিস্ট্রার সাংগঠনিক সম্পাদকের মাধ্যমে রক্ষা করিবেন।
- ২০.৩.৯ তিনি সাংগঠনিক সম্পাদকের সহযোগিতায় সংগঠনের প্রতি সাধারণ আগ্রহ সৃষ্টি করিয়া এবং যে সকল স্থলে শাখা নেই সেই এলাকায় শাখা গঠন উৎসাহিত করিয়া সংগঠনকে জোরদার করিবেন।

- ২০.৩.১০ তিনি কোন বিষয় সংগঠনের স্বার্থে প্রয়োজন বিবেচনা করিলে তাহা কেন্দ্রীয় কাউন্সিল অথবা কেন্দ্রীয় কার্যকরী পরিষদের নজরে পরামর্শ ও সিদ্ধান্তের জন্য পেশ করিবেন।
- ২০.৩.১১ তিনি বিভাগীয় সম্পাদকের কার্যক্রম তদারক ও সহযোগিতা করিবেন।
- ২০.৩.১২ তিনি অন্যান্য পেশাজীবী ও সামাজিক সংগঠনের সহিত যোগাযোগ রক্ষা করিবেন।
- ২০.৩.১৩ তিনি পদাধিকার বলে বিএমএ ডক্টরস ওয়েলফেয়ার ট্রাস্টের ট্রাস্টি বোর্ডের সদস্য থাকিবেন।

২০.৪ কোষাধ্যক্ষ :

- ২০.৪.১ তিনি সংগঠনের সকল অর্থ গ্রহণ করিবেন এবং সংগঠনের নামে কেন্দ্রীয় কার্যকরী পরিষদ কর্তৃক অনুমোদিত ব্যাংক বা ব্যাংক সমূহে জমা দিবেন এবং সংগঠনের ব্যাংক একাউন্ট যুক্তভাবে সভাপতি অথবা মহাসচিবের সহিত পরিচালনা করিবেন।
- ২০.৪.২ তিনি সকল ধরনের অর্থ সংগ্রহের দায়িত্বে থাকিবেন এবং এই সংক্রান্ত চিঠিপত্র লিখিবেন।
- ২০.৪.৩ তিনি মহাসচিব কর্তৃক অনুমোদিত এবং কেবলমাত্র তার লিখিত নির্দেশে বিল সমূহের অর্থ প্রদানের ব্যবস্থা করিবেন।
- ২০.৪.৪ তার মহাসচিবের অর্থ প্রদানের নির্দেশের কোন ভ্রান্তি কিংবা অসামঞ্জস্য তুলে ধরে সেই নির্দেশ তার মতামতের জন্য পুনরায় শ্রেরণের অধিকার রহিয়াছে। এরপরও মহাসচিব ও কোষাধ্যক্ষের মধ্যে মতানৈক্য বজায় থাকিলে বিষয়টি চূড়ান্ত সিদ্ধান্তের জন্য সভাপতির নিকট পেশ করা হইবে।
- ২০.৪.৫ তিনি সংগঠনের হিসাব-নিকাশের পুস্তক আপটুডেট রাখিয়া একাউন্টস রাখিবার দায়িত্বে থাকিবেন।
- ২০.৪.৬ তিনি সংগঠনের অডিটর দ্বারা হিসাব নিকাশ অডিট করাইবেন।
- ২০.৪.৭ তিনি কেন্দ্রীয় কার্যকরী পরিষদ ও কেন্দ্রীয় কাউন্সিলের নিকট পেশ করিবার জন্য বিভিন্ন সময় হিসাবের বিবরণী প্রস্তুত করিবেন।
- ২০.৪.৮ তিনি সংগঠনের আর্থিক অবস্থা বিবৃত করে বার্ষিক হিসাব নিকাশ ও ব্যালেন্সশীট প্রস্তুত করিবেন, ইহা কেন্দ্রীয় কাউন্সিল কর্তৃক মনোনীত অডিটর দ্বারা অডিট করাইবেন এবং কেন্দ্রীয় কাউন্সিলের নিকট গ্রহণ করার জন্য পেশ করিবেন।

২০.৫ যুগ্ম মহাসচিব :

যুগ্ম মহাসচিব মহাসচিবকে কার্য পরিচালনার ব্যাপারে সাহায্য করিবেন এবং মহাসচিবের অবর্তমানে মহাসচিবের দায়িত্ব পালন করিবেন।

২০.৬ সাংগঠনিক সম্পাদক :

মহাসচিবের সাধারণ পরামর্শের ভিত্তিতে সংগঠনের স্বার্থ রক্ষার্থে ও যে স্থানে শাখা নেই সে এলাকায় শাখা গঠনের ব্যাপারে সাহায্য করিবেন। সদস্যগণের তালিকা নিবন্ধিকরণ ও নিয়মিত করণ করিবেন।

২০.৭ বিজ্ঞান বিষয়ক সম্পাদক :

- ২০.৭.১ বিজ্ঞান বিষয়ক সেমিনার, সিম্পোজিয়াম ও ওয়ার্কশপ কেন্দ্রীয় ও শাখা ভিত্তিক নিয়মিতভাবে সম্পাদন করিবেন।
- ২০.৭.২ স্বাস্থ্য বিষয়ক জাতীয় গুরুত্বপূর্ণ বিষয় সমূহ সম্পর্কে তথ্যাদি সংগ্রহ ও প্রচার করবেন।
- ২০.৭.৩ কন্টিনিউইং মেডিক্যাল এডুকেশন কার্যক্রম কেন্দ্রে ও শাখায় নিয়মিতভাবে পরিচালনা করিবেন।

২০.৮ দপ্তর সম্পাদক :

- ২০.৮.১ কেন্দ্রীয় দপ্তরের দৈনন্দিন কার্যক্রম পরিচালনা করিবেন।
- ২০.৮.২ কেন্দ্রীয় দপ্তরের সমুদয় সম্পদ রক্ষণাবেক্ষন, বেতনভুক্ত কর্মচারী নিয়োগ ও নিয়ন্ত্রনের দায়িত্ব পালন করিবেন।

২০.৯ প্রচার ও জনসংযোগ সম্পাদক :

- ২০.৯.১ এসোসিয়েশনের বিবৃতি সমূহ চূড়ান্ত করণের পর প্রচার মাধ্যমসমূহে প্রচার নিশ্চিত করিবেন।
- ২০.৯.২ এসোসিয়েশনের সকল ধরনের প্রচার কার্যক্রম পরিচালনা করিবেন।
- ২০.৯.৩ বিভিন্ন সংস্থা, গণমাধ্যম ও ব্যক্তিবর্গের সঙ্গে যোগাযোগ রক্ষা এবং ভাবধারা বিনিময় করিবেন।

২০.১০ গ্রন্থাগার ও প্রকাশনা সম্পাদক :

- ২০.১০.১ বিএমএ গ্রন্থাগারের পরিচালনা, উন্নয়ন ও রক্ষণাবেক্ষনের দায়িত্বে থাকিবেন।
- ২০.১০.২ এসোসিয়েশনের মেডিক্যাল জার্নাল ও সাময়িকী নিয়মিত প্রকাশ করিবেন।
- ২০.১০.৩ এসোসিয়েশনের সকল ধরনে প্রকাশনা কার্যক্রম পরিচালনা করিবেন।

২০.১১ সমাজ কল্যাণ সম্পাদক :

- ২০.১১.১ পদাধিকার বলে বিএমএ ডক্টরস ওয়েলফেয়ার ট্রাস্টের ট্রাস্টি বোর্ডের সদস্য থাকিবেন।
- ২০.১১.২ ফ্রি ক্লিনিক পরিচালনার দায়িত্বে থাকিবেন।
- ২০.১১.৩ স্বাস্থ্য বিষয়ক সমাজকল্যাণমূলক কার্যক্রমের পরিকল্পনা প্রণয়ন ও বাস্তবায়ন করিবেন।
- ২০.১১.৪ জাতীয় দূর্যোগে বিএমএ'র পক্ষ থেকে ত্রাণ তৎপরতা পরিচালনা করিবেন।

২০.১২ সংস্কৃতি ও আপ্যায়ন বিষয়ক সম্পাদক :

- ২০.১২.১ বিভিন্ন জাতীয় দিবস সমূহ উদযাপন।
- ২০.১২.২ শহীদ ডাঃ মিলন দিবস উদযাপন।
- ২০.১২.৩ বিভিন্ন সাংস্কৃতিক অনুষ্ঠানের পরিকল্পনা প্রণয়ন ও বাস্তবায়ন করিবেন।
- ২০.১২.৪ তিনি বিএমএ'র বিবিধ অনুষ্ঠানের আপ্যায়ন কার্যক্রম করিবেন।

২০.১৩ আন্তর্জাতিক বিষয়ক সম্পাদক :

- ২০.১৩.১ তিনি বহিঃবিশ্বে বিভিন্ন সংস্থা ও ব্যক্তিবর্গের সঙ্গে যোগাযোগ রক্ষা, ভাবধারা বিনিময় ও আধুনিক চিকিৎসা বিজ্ঞানের তথ্যাদি আহরণ ও সংরক্ষণ করিবেন।
- ২০.১৩.২ তিনি বহিঃবিশ্বে উচ্চশিক্ষা, প্রশিক্ষণ ও কর্মসংস্থান এর সুযোগ সম্পর্কে যোগাযোগ ও সদস্যদের অবহিত করিবেন।

২১. কেন্দ্রীয় কাউন্সিলের নির্বাচন :

- ২১.১ কেন্দ্রীয় কাউন্সিলের এবং কেন্দ্রীয় কার্যকরী পরিষদের নির্বাচন সাধারণভাবে প্রতি দুই বৎসর অন্তর অনুষ্ঠিত হইবে। নির্বাচনের তারিখ কেন্দ্রীয় কাউন্সিল অন্ততঃপক্ষে সাতমাস পূর্বে ঘোষণা করিবে।
- ২১.২ কেন্দ্রীয় কাউন্সিলের নির্বাচন কেন্দ্রীয় কাউন্সিল কর্তৃক নির্বাচনের তারিখ ঘোষণার সাথে সাথে গঠিত একটি নির্বাচন কমিশন দ্বারা পরিচালিত হইবে। নির্বাচন কমিশনে থাকিবেন একজন সভাপতি, একজন সম্পাদক ও তিন জন সদস্য।
- ২১.৩ নির্বাচিত পরিষদ ঘোষিত হইবার ৩০ দিনের মধ্যে নতুন নির্বাচিত পরিষদের নিকট দায়িত্ব হস্তান্তর করিতে হইবে। নতুবা পরবর্তী দিবস হইতে আপনা আপনি দায়িত্বভার নব নির্বাচিত পরিষদের নিকট হস্তান্তরিত হইবে।
- ২১.৪ নির্বাচনে অপপ্রচার, কুৎসা ও পেশার স্বার্থবিরোধী কোন কাজ করা যাইবে না।

২১.৫ নির্বাচন কমিশনের দায়িত্ব ও কর্তব্য :

- নির্বাচন কমিশন কেন্দ্রীয় কাউন্সিলের যথাযথ ও সুষ্ঠু নির্বাচন অনুষ্ঠান এবং নির্বাচনের ফলাফল ঘোষণার জন্য দায়ী থাকিবেন। নির্বাচন কমিশন ভোটারলিষ্ট প্রকাশ, নমিনেশন পেপার ও প্রত্যাহার পত্র ইস্যু করা, নমিনেশন আহ্বান, নমিনেশন ও প্রার্থীপদ প্রত্যাহার পত্র সমূহ বাছাই করা, নির্বাচন পদ প্রার্থীদের নাম প্রকাশ, ব্যালট পেপার ইস্যু এবং ভোট সমূহ চূড়ান্ত গণনার পর নির্বাচিত প্রার্থীদের নাম ঘোষণা করিবেন। নির্বাচন পদ্ধতি সম্পর্কে সকল বিষয় নির্বাচন কমিশনের সিদ্ধান্ত চূড়ান্ত বলিয়া গণ্য হইবে।
- ২১.৬ ভোটার হইবার নিমিত্তে সদস্য তালিকায় নাম অন্তর্ভুক্তির জন্য আবেদনপত্র দাখিলের সর্বশেষ তারিখ হইবে নির্বাচনের তারিখ ঘোষণার অন্ততঃ ৬০ দিন পর।
- ২১.৭ শাখা সমূহ ২১.৬ বর্ণিত সর্বশেষ তারিখের ১৫ দিনের মধ্যে কেন্দ্রীয় শেয়ার সহ সদস্য তালিকা কেন্দ্রীয় কার্যালয়ে প্রেরণ করিবেন। এর পরবর্তীতে কোন সদস্য এই নির্বাচনের জন্য ভোটার হিসাবে গণ্য হইবেন না।
- ২১.৮ নির্বাচন কমিশন ২১.৬ বর্ণিত সর্বশেষ তারিখের একমাসের মধ্যে খসড়া ভোটার তালিকা প্রকাশ করিবেন। এর পরবর্তী ১৫ দিনের মধ্যে খসড়া ভোটার তালিকায় সংশোধনী থাকিলে তাহা নির্বাচন কমিশনের নিকট দাখিল করিতে হইবে।
- ২১.৯ নির্বাচন কমিশন খসড়া ভোটার লিষ্ট প্রকাশের এক মাসের মধ্যে চূড়ান্ত ভোটার লিষ্ট প্রকাশ করিবেন।
- ২১.১০ নির্বাচন কমিশন নির্বাচনের তারিখের অন্ততঃ ৭৫ দিন পূর্বে কর্মকর্তা, কেন্দ্রীয় কার্যকরী পরিষদের সদস্য ও শাখা সমূহ হইতে কেন্দ্রীয় কাউন্সিলের সদস্য পদের জন্য নমিনেশনপত্র আহ্বান করিবেন। এবং প্রতিটি সদস্যের জন্য নমিনেশন পেপার ও প্রত্যাহার পত্রের নমুনা ইস্যু করিবেন। এই নমুনা এসোসিয়েশনের নোটিশ বোর্ডে লাগানো হইবে এবং এসোসিয়েশনের সকল শাখার নিকট প্রেরণ করিতে হইবে।

- ২১.১১ নির্বাচনের তারিখের অন্ততঃপক্ষে ৪৫ দিন পূর্বে নির্বাচন কমিশনের নিকট নমুনা অনুযায়ী যথাযথভাবে পূরণ করিয়া বিভিন্ন পদের জন্য নমিনেশন পেপার পেশ করিতে হইবে।
- ২১.১২ প্রার্থীপদ প্রত্যাহারের সর্বশেষ তারিখ হইবে নমিনেশন পেপার প্রদানের সর্বশেষ তারিখের ১৫ দিন পর এবং নির্বাচন প্রার্থীদের চূড়ান্ত তালিকা এসোসিয়েশনের নোটিশ বোর্ডে নির্বাচনের তারিখের অন্ততঃ ৩০ দিন পূর্বে প্রকাশ করিতে হইবে। কর্মকর্তা, কেন্দ্রীয় কার্যকরী পরিষদের সদস্য ও সংশ্লিষ্ট শাখার কেন্দ্রীয় কাউন্সিল সদস্য পদপ্রার্থীদের চূড়ান্ত তালিকা এসোসিয়েশনের নোটিশ বোর্ডে প্রকাশের সাত দিনের মধ্যে সংশ্লিষ্ট শাখা সমূহে প্রেরণ করিতে হইবে।
- ২১.১৩ নির্বাচনের তারিখে প্রতিটি শাখায় এসোসিয়েশনের সদস্যদের বৈধ ভোটারদের গোপন ব্যালট পদ্ধতিতে প্রত্যক্ষ ভোটে নির্বাচন অনুষ্ঠিত হইবে।
- ২১.১৪ প্রতিটি শাখা সংশ্লিষ্ট শাখায় নির্বাচন অনুষ্ঠানের জন্য একজন প্রেসাইডিং অফিসার নিয়োগ করিবেন এবং তাহার নাম নির্বাচন কমিশনের নিকট নির্বাচনের তারিখের অন্ততঃপক্ষে ৩০ দিন পূর্বে প্রেরণ করিবেন। এই সকল প্রেসাইডিং অফিসার নির্বাচন কমিশনের প্রতিনিধি বলিয়া গণ্য হইবেন এবং তাহারা কেবল নির্বাচন কমিশনের নিকট দায়ী থাকিবেন। সুষ্ঠু নির্বাচন অনুষ্ঠানের জন্য প্রেসাইডিং অফিসার প্রয়োজবোধে কয়েকজন সহকারী গ্রহণ করিতে পারিবেন।
- ২১.১৫ যদি কোন শাখার কার্যকরী পরিষদ প্রেসাইডিং অফিসারের নাম নির্বাচনের তারিখের ১৫ দিন পূর্বে প্রেরণ করিতে ব্যর্থ হয় তাহা হইলে নির্বাচন কমিশন সেই শাখার জন্য একজন প্রেসাইডিং অফিসার নিয়োগ করিবেন।
- ২১.১৬ নির্বাচন কমিশন নির্বাচনের তারিখের পূর্বে শাখার প্রেসাইডিং অফিসারের নিকট সংশ্লিষ্ট শাখার ভোটার লিষ্ট ও দুই ধরনের ব্যালট পেপার ইস্যু করিবেন। একটিতে থাকিবে কর্মকর্তা ও কেন্দ্রীয় কার্যকরী পরিষদের সদস্য পদ প্রার্থীদের নামের তালিকা এবং অপরটিতে সংশ্লিষ্ট শাখার কেন্দ্রীয় কাউন্সিল সদস্য পদপ্রার্থীদের নামের তালিকা। প্রেসাইডিং অফিসার ব্যালট পেপার সমূহের নিরাপদ রক্ষণাবেক্ষণ, ভোটার তালিকা অনুযায়ী নির্বাচন পরিচালনা এবং বৈধ ভোট সমূহ গণনার জন্য দায়ী থাকিবেন। ভোট সমূহ গণনার পর প্রেসাইডিং অফিসার অবিলম্বে শাখার ফলাফল নির্বাচন কমিশনের নিকট ব্যক্তিগতভাবে কিংবা রেজিষ্টার্ড পোস্টে চিঠি মারফত জানাইবেন। তিনি নির্বাচন কমিশনের নিকট গণনা করা ও অব্যবহৃত ব্যালট পেপার সমূহ যথাযথভাবে সিল করা খামে নির্বাচন কমিশনের নিকট প্রেরণ করিবেন এবং নির্বাচন কমিশন ইহাদের পরবর্তী নির্বাচন ঘোষণা অবধি সংরক্ষণ করিবেন।
- ২১.১৭ প্রার্থীগণ কিংবা তাদের নির্ধারিত সংখ্যক প্রতিনিধিগণ ভোট কেন্দ্র এবং গণনার সময় উপস্থিত থাকিতে পারিবেন।
- ২১.১৮ শাখা সমূহের প্রেসাইডিং অফিসারের যথাযথ স্বাক্ষরের পর নির্বাচন তারিখের ১০ দিনের মধ্যে শাখায় অনুষ্ঠিত নির্বাচনের ফলাফল নির্বাচন কমিশনের নিকট পৌছাইতে হইবে। এই নির্ধারিত সময়ের পর প্রাপ্ত ফলাফল হিসাবে আনা হইবে না।
- ২১.১৯ নির্বাচন কমিশন শাখা সমূহ হইতে নির্ধারিত সময়ের মধ্যে প্রাপ্ত নির্বাচনের ফলাফল সমূহ জমা করিবেন, সর্বমোট নির্বাচন ফলাফল সমূহ গণনা করিবেন এবং নির্বাচিত ব্যক্তিদের নাম ঘোষণা করিবেন।
- ২১.২০ যে সকল শাখা উপরোক্ত কেন্দ্রীয় কাউন্সিল নির্বাচনে কোন কারণে নির্ধারিত সময়ের মধ্যে তাহাদের ফলাফল প্রেরণে ব্যর্থ হন, তাহারা কেন্দ্রীয় নির্বাচনের তারিখের ৩০ দিনের মধ্যে সংশ্লিষ্ট শাখা হইতে কেন্দ্রীয় কাউন্সিলের সদস্যদের নির্বাচন অনুষ্ঠান করিবেন।
- ২১.২১ নির্বাচন অনুষ্ঠানের পর কোন নির্বাচন সংক্রান্ত বিরোধ উত্থাপিত হইলে তাহা এসোসিয়েশনের ২০ ধারা অনুযায়ী ট্রাইবুনালের উপর ন্যস্ত করা হইবে।

২২. সভাপতির প্রার্থীপদের যোগ্যতা :

এসোসিয়েশনের সভাপতি পদপ্রার্থী ব্যক্তিকে নমিনেশন পত্র দাখিলের সময় এসোসিয়েশনের ধারাবাহিকভাবে অন্ততঃ পাঁচ বছরের সদস্য পদ থাকিতে হইবে।

২৩. অন্যান্য কর্মকর্তাদের প্রার্থীপদের যোগ্যতা :

এসোসিয়েশনের অন্যান্য কর্মকর্তাদের প্রার্থীপদের নমিনেশনপত্র দাখিলের সময় এসোসিয়েশনের ধারাবাহিকভাবে অন্ততঃ তিন বছরের সদস্যপদ থাকিতে হইবে। তবে কেন্দ্রীয় কাউন্সিল ও কেন্দ্রীয় কার্যকরী পরিষদের সদস্যদের ক্ষেত্রে নতুন তালিকাভুক্ত সদস্যগণ নির্বাচনে প্রার্থী হওয়ার উপযুক্ত।

২৪. অডিটরদের নিয়োগ :

নিম্নবর্ণিত উপায়ে এসোসিয়েশনের এবং ইহার জার্নাল ও অন্যান্য প্রকাশনার হিসাব-নিকাশ অডিট করিবার জন্য বাংলাদেশ মেডিক্যাল সম্মেলনের সময় অনুষ্ঠিত কেন্দ্রীয় কাউন্সিলের সভায় অডিটরগণ নিযুক্ত হইবেন এবং সম্মেলনের সাধারণ পরিষদে এই নিযুক্তি অনুমোদিত হইবে।

২৪.১ সাধারণ সভা কিংবা কেন্দ্রীয় কাউন্সিল অথবা সভাপতির ইচ্ছাক্রমে যে কোন সময় হিসাবসমূহ অডিট করিবেন এবং ইহার যথার্থতা সম্পর্কে সত্যায়ন করিবেন।

২৪.২ হিসাবসমূহ যথারীতি রক্ষার জন্য পরামর্শ প্রদান করিবেন।

২৫. সম্মানী আইন পরামর্শদাতা :

সম্মানী আইন পরামর্শদাতা বাংলাদেশ মেডিক্যাল সম্মেলনের সময় অনুষ্ঠিত কেন্দ্রীয় কাউন্সিলের সভায় নির্বাচিত হইবে।

২৬. বাংলাদেশ মেডিক্যাল সম্মেলন :

এসোসিয়েশনের উদ্যোগে কেন্দ্রীয় কাউন্সিলের সিদ্ধান্ত অনুযায়ী সুবিধাজনক সময় ও তারিখে প্রতি বছর কিংবা কেন্দ্রীয় কাউন্সিলের সিদ্ধান্ত মোতাবেক কোন সময় বাংলাদেশ মেডিক্যাল সম্মেলন অনুষ্ঠিত হইবে। এসোসিয়েশনের শাখাসমূহ সম্মেলনে স্বাগতিক নগর হইবার অধিকার রাখে।

২৭. সম্মেলনের স্থান :

মহাসচিব প্রস্তাবিত বাংলাদেশ মেডিক্যাল সম্মেলনের অন্ততঃ তিনমাস পূর্বে পরবর্তী বৎসর সম্মেলনে আমন্ত্রণ জানাইতে আগ্রহী কিনা জানিতে চাহিয়া সকল শাখাকে সার্কুলার প্রেরণ করিবেন। কোন আমন্ত্রণ আসিলে পরবর্তী বাংলাদেশ মেডিক্যাল সম্মেলন অনুষ্ঠানের স্থান স্থির করিবার জন্য, ইহা এসোসিয়েশনের সাধারণ পরিষদে পেশ করা হইবে। সম্মেলনের অধিবেশনে এই সংক্রান্ত সিদ্ধান্ত জানানো হইবে।

২৮. স্থানীয় শাখার কার্যকরী পরিষদের নির্বাচন :

২৮.১ এসোসিয়েশনের স্থানীয় শাখার কার্যকরী পরিষদের নির্বাচন সাধারণভাবে প্রতি দুই বৎসর অন্তর শাখার সদস্যদের প্রত্যক্ষ ভোটে গোপন ব্যালট পদ্ধতিতে অনুষ্ঠিত হইবে।

২৮.২ শাখার কার্যকরী পরিষদ সমূহের নির্বাচন এসোসিয়েশনের বর্ষের প্রথম তিন মাসের মধ্যে কিংবা কেন্দ্রীয় নির্বাচনের সময় হইলে ভালো।

- ২৮.৩ প্রতিটি স্থানীয় শাখায় শাখা কার্যকরী পরিষদের নির্বাচন শাখার কার্যকরী পরিষদ কর্তৃক নির্বাচিত একটি “নির্বাচন কমিটি” দ্বারা পরিচালিত হইবে। নির্বাচন কমিটি নিম্নবর্ণিত ব্যক্তিদের দ্বারা গঠিত হইবে :
আহবায়ক - ১ জন
সদস্য ২-৩ জন
- ২৮.৪ শাখার কার্যকরী কমিটির সিদ্ধান্ত অনুযায়ী নির্বাচনের তারিখ অন্ততঃ পক্ষে ৭৫ দিন পূর্বে ঘোষণা করিতে হইবে।
- ২৮.৫ ভোটার হিসাবে অন্তর্ভুক্তির সর্বশেষ তারিখ নির্বাচনের তারিখ ঘোষণার পাশাপাশি অন্ততঃ পক্ষে ১ মাস পূর্বে ঘোষিত হইবে।
- ২৮.৬ নির্বাচন কমিটি নির্বাচনের অন্ততঃ ৪০ দিন পূর্বে খসড়া ভোটার তালিকা প্রকাশ করিবেন এবং ভোটার তালিকায় কোন ত্রুটি সংশোধনের আবেদন ইহা প্রকাশের পাঁচ দিনের মধ্যে নির্বাচন কমিটিকে জানাইতে হইবে।
- ২৮.৭ চূড়ান্ত ভোটার তালিকা নির্বাচনের অন্ততঃ পক্ষে ৩০ দিন পূর্বে প্রকাশ করিতে হইবে।
- ২৮.৮ নির্বাচন কমিটি কর্তৃক ৩.৩.২ উপধারা অনুযায়ী শাখা কার্যকরী পরিষদের বিভিন্ন পদের জন্য নির্ধারিত ফর্মে নির্বাচনের অন্ততঃ পক্ষে ৩০ দিন পূর্বে নমিনেশন পেপার আহ্বান করা হইবে।
- ২৮.৯ নির্বাচন কমিটি নমিনেশন পেপার ও প্রত্যাহার পত্রের নির্ধারিত ফর্ম শাখার সদস্যদের জন্য ইস্যু করিবেন এবং ফর্মসমূহ শাখার নোটিশ বোর্ডে বুলাইয়া দিবেন।
- ২৮.১০ ইহার পর নির্বাচন কমিশন নমিনেশন পেপারসমূহ যাচাই করিবেন এবং নির্বাচনের জন্য প্রার্থীদের নাম ঘোষণা করিবেন।
- ২৮.১১ নির্বাচন কমিশন নমিনেশন পেপার গ্রহণের সর্বশেষ তারিখের ৫ দিনের মধ্যে প্রার্থীদের নিকট হইতে প্রার্থী পদ প্রত্যাহার পত্র নির্ধারিত ফর্মে গ্রহণ করিবেন।
- ২৮.১২ নির্বাচন কমিটি নির্বাচনের প্রার্থীদের চূড়ান্ত তালিকা নির্বাচনের ১৫ দিন পূর্বে প্রকাশ করিবেন।
- ২৮.১৩ প্রার্থীরা নিজে কিংবা তাহাদের নির্ধারিত সংখ্যক প্রতিনিধিগণ ভোট কেন্দ্রে ও গণনাস্থলে উপস্থিত থাকিতে পারিবেন।
- ২৮.১৪ নির্বাচন কমিটি নির্বাচন পরিচালনা, ব্যালট পেপার গণনা, নির্বাচিত প্রার্থীদের নাম ঘোষণা এবং এসোসিয়েশনের কেন্দ্রীয় কার্যালয়ে নির্বাচনের ফলাফল জানাইবেন।
- ২৮.১৫ নির্বাচন সম্পর্কে কোন বিরোধ নির্বাচনের পরে ২০ নং ধারা অনুযায়ী নির্বচনী ট্রাইব্যুনালের নিকট পেশ করা যাইবে।

সমাপ্ত